

Mak
Lagale Lavavang At Ne Iesu Karisito
Mak Ga Malagan I
Levelinga Loklox Axasep
Levenmaares 55–65 A.D.

Mak neni ga malagan levelinga mumu ne Iesu, Nitna ne Moroa. Laasen at ne Mak neni ne Jon Mak, ni ga silok to Jerusalem la ga lok tooro ne Pita, Pol, la ne Banabas mi lugugu. Neni lamdak at neton ne Banabas, lentangas at ne Pol. Loxongkulao silok at lotu diga nua i do ne Mak nat pas uto Rom, la neni gak lok eburu mi ne Pita. Pita ga tere la ga paase la ne Mak ga malagan li levelinga at na lubuk. Neni ga malagan i xusu limixin boro Rom diba xasep at lempapaase at ne Iesu. Limixin boro Rom diga vavara aleng levenasen silok. Kuren la neni ga malagan na lubuk mi levelinga xeretna. Iesu ga silok aleng la ga ruuna lolos kusu ni na lox aroo limixin la na riki pes lubunggas basinge limixin, la na soxomus ned i basinge loxokoxo ap mo laxakapmek digak lok keneng teren.

Lengkot silok keneng at na lubuk

1:1-13 Lovotpot at ne Jon, laradi sep susu, la ne Iesu.

1:14-9:50 Leven gugu at ne Iesu ro Galili.

10:1-52 Lavatpas at ne Iesu uto Jerusalem.

11:1-14:3 Levenanasa at ne Iesu ro Jerusalem.

14:4-15:47 Larangtanga alis la lanmet at ne Iesu.

16:1-20 Iesu ga roo xat amlong basinge lanmet.

Lavavang At Ne Jon
Laradi Sep Susu Limixin
(Mt 3:1-12; Lu 3:1-18; Jo 1:19-28)

¹ Na Lagale Lavavang mumu ne Iesu Karisito, Nitna ne Moroa. ²* Ga ruka i kerekngan ne Aisaia leeme vapaase ali at ne Moroa ga malagan ali i at Lovoang Kaala xeretna, “Nenia naba riki laradi vapaase rak nabamgo ru la na gagas li langas tu. ³ Lara mo ip kup to at lamatbin keretna, mina gagas li langas ti Leeme Silok kusu tin tit pas. Mina lox akmokso larangas tin.” *Mal 3:1; Ais 40:3*

⁴* La ne Jon, laradi sep susu ga rupot to at lamatbin la ga sep susu limixin la ga vavang keretna, “Mina leeng basinge laxakapmek atnimi la mina lok ka lesep susu, kusu ne Moroa naba doxoma xepe leveloklok kakapmek atnimi.” ⁵ La buaang limixin digat pot pasa amisik ne Jon to at lamatbin. Digat pas boro at lemenemen silok Jerusalem la levengkot axap at lenep silok Judaia. La diga tong asu leveloklok kakapmek atdi la ne Jon ga sep susu ba di ro at ladan sen Joridan. ⁶* Jon ga siga lavanga singsiga diga lox i mi laxabinim at lakamel. Neni ga etara avarang lavanga singsiga ren mi labanbaane diga lox i mi labantuxu at lavanga mi lavanuet kangkedek teren. La neni ga anan levenasku mi laxanmisiu boro at laxairing. ⁷* La neni ga vavang bok keretna, “Melemu rak lara naba rupot. Lolos teren i volo lolos tarak. Axo epovo xusu ana soxomus luvanga vatpas teren mila neni i silok aleng tia.* ⁸ Nenia a sep susu nimi mi ladan mene nga, ketla neni naba sep susu nimi mi Loroonan Kaala.”

*Jon Ga Sep Susu Ne Iesu
(Mt 3:13-17; Lu 3:21-22)*

* **1:2:** Mt 11:10 * **1:4:** Gu 13:24; 19:4 * **1:6:** 2 Lav 1:8; Mt 11:8
* **1:7:** Gu 13:25 * **1:7:** Anai ni lavapaase poovo ri lox asuusu i do ne Jon ga lox asu langangan loklok ngangao ren ti ne Iesu.

⁹ Ap mo levenaleng, ne Iesu ga laa boro at lenep Galili at lemenemen teren Nasaret la ga vot pasa ne Jon. La ne Jon ga sep susu i ro ladan sen Joridan. ¹⁰ La ne Iesu ga vas basinge ladan la soso mun neni ga ven laxalibet ga rem suang, ga ven bok Loroonan Kaala ga lok ngan lamno ga rava si, la ga nemen teren. ¹¹ *La laxaka at lara ga laa boro vana at laxalibet ga lok keretna, “Nena ne nuruk. A balamu i la a lok momo min.”

Satan Gak Lok Tong

Pen Ne Iesu

(Mt 4:1-11; Lu 4:1-13)

¹² La soso mun Loroonan Kaala ga riki ne Iesu uto at lamatbin. ¹³ *La neni ga nemen e at lavanuet sangaun aleng. La ne Satan gak lok tong pen i. La ap mo lenep lempanga sio mi lavanuet kangkedek atdi diga nemen box e la lubungangelo digak lok tatao ne Iesu.

Iesu Ga Ro Xaka Lavanuet Luvuttadi Sepsep Mat

(Mt 4:12-22; Lu 4:14-15; 5:1-11)

¹⁴ *At lara laaleng diga ranga alis ne Jon la diga lok li i ro at loogu xokoxo, la melemu ren ne Iesu gamlong uto at lenep Galili la ga tong asu Lagale Lavavang at ne Moroa. ¹⁵ *Neni ga vavang keretna, “Levenaleng ngangais ira xap ta. Langas ti Linintoo at ne Moroa monga i auret. Mina leeng basinge leveloklok kakapmek atnimi la mina nunu at Lagale Lavavang.”

¹⁶ La ne Iesu gat pas saparap lavatdan kis Galili la ni ga ven legepu radi sepsep mat, ne Simon mi ne Endru. Nedu leeton duga loloa mi laxatkat to at lavatdan kis. ¹⁷ *La ne Iesu ga lok tidu xeretna, “Ude numu, muna mumu asu ia.

* **1:11:** Sam 2:7; Ais 42:1; Mt 12:18; Mk 9:7 * **1:13:** Sam 91:11-13

* **1:14:** Mk 6:17 * **1:15:** Mt 3:2; Ga 4:4 * **1:17:** Mt 13:47; Lu 5:1-11

Nenia anaba lox ase numu mi langas ti sat kaka limixin i ngan tai mo, nemu mu loloa ka lenmat.”¹⁸ La soso mun nedu duga on basinge laxatkat atdu la duga emu min.

¹⁹ La ne Iesu gat pas uto lixilik la ga ven ne Jems, nitna ne Sebedi la ga ven bok neton, ne Jon. Nedi digat kis at lese pang la diga lox agagas li lengkatkat. ²⁰ La soso mun ni ga ro xaka du la duga vas kaxat, duga on basinge ne temen du mi luvuttadi gugu ro at lese pang la duga emu min.

Iesu Ga Riki Xepe Lagas Basinge Laradi
(Lu 4:31-37)

²¹* La ne Iesu eburu mi lavaun pinivu ren diga onon uto at lemenemen Kaprenaum la at laaleng kaala diga vubeles at loogu singising la ne Iesu ga anasa limixin. ²²* La nom limixin diga sangu mila levelinga ren ga mumuat, neni xopmen goxo anasa ngan luvuttadi loklox ase at Laulis Linga. ²³ La soso mun lara laradi ga xatu upana ro xeneng at loogu singising, lagas ga suxuna i la ni gap kup keretna, ²⁴* “Iesu me Nasaret, unaba lok lavanga salai rinama? Uga rupot kusu unaba sep kepe axap nema, do? Aklen u. Nenu ne Nitna ne Moroa.”

²⁵ La ne Iesu ga vaase lolos tin, “Una lok pilo. Una sixisu basinge na laradi.” ²⁶* La nom lagas ga lox adede lolos nom laradi, la gap kup silok, la ga sixisu basinge ba i.

²⁷ La limixin axap diga sangu aleng la diga epaase xeretna, “Loklok salai mo? Laanasa maxat mo, do? Lolos teren i silok. I tong asu levelinga ti lubunggas la di mu asu i.” ²⁸* La nom limixin diga onon la diga tong nom lavanga ne Iesu ga lox i la limixin axap to at lenep Galili diga rongga i.

* 1:21: Mt 4:13 * 1:22: Mt 7:28-29 * 1:24: Mk 5:7 * 1:26: Mk 9:26
* 1:28: Mt 4:24

*Iesu Ga Lox Aroo
Buaang Limixin*

(Mt 8:14-17; Lu 4:38-41)

²⁹ La ne Iesu ga vas su at loogu singising la soso mun nedi mi ne Jems la ne Jon diga vubeles at loogu at ne Simon la ne Endru. ³⁰ La luvutulom at ne Simon ga meres mi liplivi la gak midi ro at loora ren. Diga tong i nom ti ne Iesu, ³¹ la soso mun ne Iesu ga vot pasa i, ga rebeng axatu i la liplivi ga xap basinge i. La ni ga lox agagas lempanga anan tinedi.

³² Ga ukantinao laxangking ga lotup, limixin me go diga vot pasa ne Iesu, diga lam kaka limixin mi laxanasen anmeres la limixin lubanggas ga suxuna di. ³³ Buaang limixin ap mo lemenemen diga vot saparap ne Iesu ap mo loogu. ³⁴*La ne Iesu ga lox aroo limixin mekmeres la ga riki xepe lubanggas basinge limixin. Lubunggas digaklen i do ne Iesu nitna ne Moroa, ketla ne Iesu goxo siam do dina tong asu i ri limixin.

Iesu Ga Vavang To Galili

(Lu 4:42-44)

³⁵*Taba umaxantamak suubu gak lok main kakalik move, Iesu ga aus la ga vas su la gat pas uto at lenep mimila la neni ga lok lising. ³⁶ La ne Simon eburu mi larapen tangas teren diga puse rin ³⁷ se diga vuse ka i, la diga lok tin keretna, “Limixin axap di puse ru.”

³⁸ La ne Iesu ga lok tidi xeretna, “Ata onon uto at levenmenemen petpes kusu ana vavang bok go. Ni lavasuun teren la nenia aga si ude xopok at lavatbung menemen.”

³⁹*La ne Iesu gat pas tangtagap at levengkot axap at lenep Galili. La ni ga vavang to at laraogu singising atdi la ni ga riki xepe lubanggas basinge limixin.

* **1:34:** Mk 3:11-12 * **1:35:** Mt 14:23; Mk 6:46 * **1:39:** Mt 4:23; 9:35

*Iesu Ga Lox Aroo Laradi
(Mt 8:1-4; Lu 5:12-16)*

⁴⁰ At lara laaleng lara laradi ga vot pasa ne Iesu. Lanmeres gak lok teren, diga tong i mila lanmeres gu (leprosy). La neni ga sing ne Iesu kusu ne Iesu na lox aroo i. La neni ga xis tiktikbu mi luvatgulom teren ti lok ngangao at ne Iesu la ga lok tin, “Do u vara i, una lox aroo ia.”

⁴¹ La ne Iesu ga balamu i la ga song asu mi lekngen la ga long tu ren la ga lok tin keretna, “A vara i, lanmeres taram na xap ta.” ⁴² La soso mun nom lanmeres ga xap la nom laradi ga lox avukat.

⁴³ La ne Iesu ga paase lolos tin la ga riki aonon i, ⁴⁴* ni ga vaase rin keretna, “Nemen uta tong asu i na ri teta, ketla unat pas uto at lamaasa la neni na ven mumu u. Melemu una lok laramtaba ram ti ne Moroa ngan ne Moses ga tong i xusu ti lox asuusu i ri limixin axap do nenu mo ura lox avukat ta.” ⁴⁵ Ketla nom laradi ga vas kaxat la ga tong asu i ri limixin axap. Kuren la ne Iesu gat pas lipe mene ro at levenmenemen, mila buaang limixin diga lox angtang amisix i. La ni ga nemen to at lamatbin, ketla buaang limixin move diga tupot pasa i, diga laala boro at levengkot axap.

2

*Iesu Ga Lox Aroo Laradi Labantuxu Ren Ga Molo Axap
(Mt 9:1-8; Lu 5:17-26)*

¹ Lentaba levenaleng ga xap la ne Iesu gamlong uto Kaprnaum la limixin diga rongga levelinga do ne Iesu ga rupot to at loogu ren. ² La buaang limixin diga vot eburu go la nom loogu ga umsu la no maxamang bok saparap lumusmaragu ga umsu bok. La ne Iesu ga vavang tidi. ³ La

* 1:44: Mk 3:12; 7:36; Mas 14:1-32

lentaba limixin diga rupot to at nom loogu la lavanuet atdi digap kip lara laradi mi loora ren. Nom laradi ga meres, labantuxu ren ga molo axap. ⁴ La nedi di goxo epovo dina vot saparap ne Iesu min mila buaang limixin diga rupe lumusmaragu. Kuren la nedi diga eng urut at nom loogu la diga ut avolo loxot to mavana saparap ne Iesu la diga lox asi nom laradi mekmeres mi loora ren. ^{5*} La ne Iesu ga ven kibis lununu atdi la ga lok ti laradi mekmeres keretna, “Lentangas tarak. Leveloklok kakapmek axap taram, a doxoma xepe i.”

⁶ La lentaba luvuttadi loklox ase at Laulis Linga digat kis go, diga ronga nom levelinga at ne Iesu la diga esue at levendoxoma atdi xeretna, ^{7*} “Na laradi i paase kereva? I paase vupu ri ne Moroa. Nege i epovo ti doxoma xepe leveloklok kakapmek? Moroa xusuk i epovo.”

⁸ La soso mun ne Iesu ga doxoma xisip nom levendoxoma atdi la ga lok tidi xeretna, “Tila nemi mi doxoma ekarakat mumu i na levelinga rak? ⁹ Ua levelinga xopmen na lolos ti tong i? Leveloklok taram ara doxoma xepe vam i, kopla ana tong i do, katu kaxat la unat pas? ¹⁰ Ketla a vara i do minaklen i do, nenia, Laradi Mevana, a ruuna lolos at na lavatbung menemen ti doxoma xepe leveloklok kakapmek.” La ni ga lok ti mo laradi mekmeres keretna, ¹¹ “A tong i ru, una xatu upana, la una xip kaka loora ram, la una vas kaxat ukolonu.” ^{12*} La nom laradi ga xatu kaxat, la ga xip kaka loora ren la ga vas kaxat. La nedi axap diga ven i, diga sangu aleng la diga emi asu mi ne Moroa la diga epaase xeretna, “Nedik goxovisi na ven tempanga xeretnom.”

Iesu Ga Ro Xaka Ne Levi
(Mt 9:9-13; Lu 5:27-32)

* 2:5: Lu 7:48 * 2:7: Ais 43:25; 1 Jo 1:9 * 2:12: Mt 9:33

¹³ La melemu ne Iesu ga on basinge manga lemenemen Kaprenaum la gat pas saparap lavatdan kis Galili. La buaang limixin diga vot pasa i la neni ga anasa di. ¹⁴*La melemu ni gat pas uto lixilik la ga ven ne Levi nitna ne Alpias, gat kis to at loogu xekepe pilas. La ne Iesu ga lok tin keretna, “Una mumu asu ia.” La ne Levi ga xatu la ga mumu asu i.

¹⁵ Melemu ne Iesu gat kis la ga anan to at loogu at ne Levi. Luvuttadi xekepe pilas la limixin kakapmek* diga anan eburu mi ne Iesu. Buaang limixin kakapmek diga mumu asu ne Iesu. ¹⁶*La luvuttadi loklox ase at Laulis Linga mi lubung Parisi diga ven i do ne Iesu ga anan eburu mi nom limixin kakapmek la diga lok ti lavaun pinivu at ne Iesu xeretna, “Tila ne Iesu i anan eburu mi nom luvuttadi loklok ka pilas la limixin kakapmek?”

¹⁷ La ne Iesu ga rongga i nom la ga lok tidi xeretna, “Limixin di lox avukat, kopmen dinak pakes ti loklok tooro, ketla nedi xusuk mun dik meres. Aga rupot kusu ti ro xaka limixin kakapmek dikpakes kusu dina leeng, la nia goxo rupot kusu tinedi limixin manmanton.”

*Iesu Ga Paase Mumu Loklok Ti Mun Anan
(Mt 9:14-17; Lu 5:33-39)*

¹⁸ At lara laaleng lavaun pinivu at ne Jon, laradi sep susu limixin, diga mun anan la lubung Parisi bok diga mun anan. La lentaba limixin diga vot pasa ne Iesu la diga sue i xeretna, “Lavaun pinivu at ne Jon di mun anan la lubung Parisi bok di mun anan. Tila ba lavaun pinivu ram kopmen dina mun anan?”

¹⁹ La ne Iesu ga vorang i ridi mi lavapaase poovo xeretna, “At loklox anarong ti leepot, lentaba at laradi

* **2:14:** Jo 1:43 * **2:15:** Anai, nedi luvuttadi me Judaia ua kopmen di goxo mumu asu avukat Laulis Linga mi leveloklok atdi limixin me Judaia.

* **2:16:** Mt 11:19; Lu 15:1-2

epot di noxo mun anan mila laradi epot ik lok eburu midu.
²⁰ Ketla laaleng move naba rupot la limixin petpes dinaba lam ka laradi epot basinge lentaba ren la dina mun anan ba ap mo laaleng.”

Lempapaase Poovo Mumu Levenanasa Maxat At Ne Iesu

²¹ La ne Iesu ga tong asu lavapaase poovo ridi xeretna, “Kopmen teta na balais ka loxontamon maxat kusu na sok gatgat pe lamamara at labantamon maut. Mo do neni na lox i xuren, loxontamon maxat ira lok kapmek pam la kopmen na epovo bok ba kusu ata ba lok tavanga min. La nom loxontamon maxat noxo epovo kusu na lok pe avukat lamamara at loxontamon maut.”

²² La ne Iesu ga vaase bok tidi mi lavapaase poovo. Ni ga lok keretna, “Kopmen tara na soli li laxadan vaen maxat uto xeneng ti labantuxu at lavatme i maut pam. Mo do neni na lox i xuren, mo labantuxu maut ba repagam la laxadan vaen naba soli su ukamang, la labantuxu maut naba lok kapmek. Laxadan vaen maxat mina soli li i at labantuxu maxat.”

*Iesu Ga Paase Mumu
 Laaleng Kaala*

(Mt 12:1-8; Lu 6:1-5)

²³ At lara laaleng kaala Iesu mi lavaun pinivu ren diga vas polo lentaamang piao la lavaun pinivu ren diga dik ka levempeven piao la diga anan i. ²⁴ *La lubung Parisi diga ven i nom la diga lok ti ne Iesu xeretna, “Pen ba i nom. Dira los polo vam Laulis Linga, i tong i do nemen mitak lok lempanga keretnom at laaleng kaala.”

²⁵ *La ne Iesu ga lok tidi xeretna, “Mina doma su ap mo lempanga ne Devit, ga lox i at laaleng neni eburu mi limixin teren digak pakes la diga roxo. ²⁶ *Neni ga

* 2:24: Lal 23:25 * 2:25: 1 Sml 21:1-6 * 2:26: Mas 24:5-9

vubeles at loogu at ne Moroa ap mo lamaares ne Abaita neni laradi gomgo at lavamaasa. La ne Devit ga lok ka mo lengkongkide digam taba min ti ne Moroa, la ni ga anan teren la ga raba bok lengkot teren ti limixin teren. La kerepmo diga los polo Laulis Linga, mila lavamaasa kusuk mun diga anan mo lengkongkide.”

²⁷ *La ne Iesu ga lok bok tidi xeretna, “Moroa ga lok li laaleng kaala ri lok tooro limixin. Neni goxo rudum li limixin kusu ti lok tooro laaleng kaala. ²⁸ Nenia Laradi Mevana. La nenia Lamgomgo at laaleng kaala la ak lok tatao mo laaleng.”

3

Iesu Ga Lok Tooro Laradi Lekngen Ga Molo (Mt 12:9-14; Lu 6:6-11)

¹ La melemu ne Iesu ga vubeles manga to at loogu singising. Lara laradi mi lekngen ga molo gat kis go. ² Lubung Parisi diga reven pilo ne Iesu do neni naba lox aroo nom laradi at laaleng kaala. Diga vara i do nedi dina sok taba ne Iesu mi tevelinga. ³ La ne Iesu ga tong i ri nom laradi mi lekngen ga molo keretna, “Una xatu kaxat ude melango at limixin axap.”

⁴ *La ne Iesu ga sue lubang Parisi xeretna, “Lavanga salai Laulis Linga i siam min kusu ata lox i at laaleng kaala? Ti lok tooro laradi koplā ti lox asongor i? Ti lox arooro laradi koplā ti sev amer i?” Ketla di goxo vorang i.

⁵ *La ni ga ven tangtagap tinedi la ga musak di la ga lok bukbulu aleng bok atla lebelendi ga lolos aleng. La ni ga lok ti nom laradi xeretna, “Una song asu mi lakngam.” La nom laradi ga song asu mi lekngen la lekngen ga lox

* 2:27: Lal 5:14 * 3:4: Lu 14:3 * 3:5: Jo 11:33

avukat. ⁶*La lubung Parisi diga on basinge loogu singising la soso mun diga vot pasa luvuttadi diga etangas mi ne Erodes. La nedi diga puse ngas kusu dina sev amet ne Iesu.

Buaang Limixin Diga Mumu Asu Ne Iesu

⁷ La ne Iesu mi lavaun pinivu ren diga on basinge loogu singising la diga vas si uto at lavatdan kis Galili. La buaang limixin diga mumu asu i. Nedi limixin diga laa boro at lengkot axap, lentaba boro at lenep silok Galili, ⁸*lentaba boro at lenep silok Judaia, lentaba boro at lemenemen silok Jerusalem, lentaba boro at lenep silok Idumia, lentaba boro Joridan at lenep dan meso, lentaba boro at lenep silok at lumenemen Taia la Sidon. Nedi axap diga vot pasa ne Iesu mila diga ronga nom lempanga neni ga lox i. ⁹*La ne Iesu ga tong i ri lavaun pinivu ren dola dina lok ka lese pang lixilik tin ti ru ren. La neni ga vavang ti limixin to at nom lese pang mila buaang limixin diga vot saporav i la diga umsu aleng. ¹⁰*Diga vot saporav i mila neni ga lox aroo buaang limixin. La limixin mi levenasen anmeres diga esi xakape ti long tu ren kusu levenanmeres atdi na xap. ¹¹*La lentaba limixin lubunggas ga suxuna di, diga rupot saporav ne Iesu la diga xis tiktikbu mi lempatgulom atdi. Ga se diga ven i, digap kup silok keretna, “Nenu Nitna ne Moroa.” ¹²*La ne Iesu ga vaase pe lubunggas dola di noxo tong asu i ri limixin dola neni Nitna ne Moroa.

Iesu Ga Lok Katling Lasangaun Mi Legepu Radi

(Mt 10:1-4; Lu 6:12-16)

¹³ La melemu ne Iesu ga urut at lavatkaana la ga ro xaka mo luvuttadi neni ga vara i do dina gugu eburu min. La

* **3:6:** Mt 22:15-16 * **3:8:** Mt 4:25 * **3:9:** Mk 4:1; Lu 5:1-3 * **3:10:**
Mt 14:36 * **3:11:** Lu 4:41 * **3:12:** Mk 1:34

nedi diga vot pasa i. ¹⁴ La ni ga lok katling lasangaun mi legepu radi la ga so asen di mi luvuttadi vavang. Ni ga soxolik kaka di xusu dina nemen eburu min la kusu neni naba riki di ti vavang ¹⁵ la ti riki xepe lubunggas basinge limixin. ¹⁶ *Levenasen at nom luvuttadi, ne Simon, Iesu ga raba box i mi lara laasen, ne Pita. ¹⁷ *La ne Jems du lueton mi ne Jon, lumdak at ne Sebedi. Iesu ga raba bok du mi lara laasen, ne Boaneges, lavasuun at nom loxolinga xeretna, di paase mukmusak ngan lavanga i mam. ¹⁸ La bok ne Endru la ne Pilip, la ne Batolomiu, la ne Metiu, la ne Tomas, la ne Jems nitna ne Alpias, la ne Tadius, la ne Simon, neni lara at libinam tadi me Selot, ¹⁹ la ne Judas Iskariot, neni nom laradi ga song araba ne Iesu ri limixin kakapmek.

Iesu Ga Paase Mumu Ne Satan
(Mt 12:22-32; Lu 11:14-23; 12:10)

²⁰ Melemu ne Iesu midi diga vubeles uto at loogu la buaang limixin diga vot pasa manga di. La ne Iesu mi lavaun pinivu ren di goxo epovo na anan mila buaang limixin digak lox angtang di. ²¹ *Se lentaba at ne Iesu diga rongga i nom, diga lok do dina rupot ti lam kaka i mila diga lok do ne Iesu gang tangku.

²² *La luvuttadi loklox ase at Laulis Linga diga laa boro Jerusalem la diga lok keretna, “Belsebul i suxuna i mi lolos teren la neni leeme gomgo at lubunggas la neni ira riki xepe lubunggas.”

²³ La ne Iesu ga ro xaka luvuttadi loklox ase at Laulis Linga la ga lok tidi xeretna, “Lavapaase atnimi xopmen nak mokso mila ne Satan noxo riki xepe lubunggas teren.”

²⁴ La ne Iesu ga paase poovo ridi xeretna, “Dola tubung mixin di epes di ri lengkon binam tadi, la dia esep

* 3:16: Jo 1:42 * 3:17: Lu 9:54 * 3:21: Jo 10:20 * 3:22: Mt 9:34;

eburu minedi xa, kopmen noxo lok nunuan letuna atdi. ²⁵Loxoetemen do di epes ti esep, dinaba xis epeseves. ²⁶La kerepmo bok do ne Satan mi lubunggas dina esep, dinaba epeseves la lolos at ne Satan naba xap.

²⁷Do tara i vara na xip pilo xaka lempanga at loogu at taradi lolos, neni na xoxo alis be mo laradi la melemu na xip kaka ba lempanga ren. ²⁸Nia a tong tuturun i rinimi. Moroa naba doxoma xepe leveloklok kakapmek at limixin axap la neni naba doxoma xepe levelinga kapmek limixin dina paase mumu i min. ²⁹Ket do tara na vaase vupu ri Loroonan Kaala, ne Moroa noxo doxoma xepe rinotno i. Neni i bixurun mi laxakapmek ua ixo epovo do ne Moroa na doxoma xepe i.”

³⁰Iesu ga tong i na atla luvuttadi loklox ase at Laulis Linga diga lok do lagas ga suxuna ne Iesu.

Nege Libibinat Tuturun

At Ne Iesu?

(Mt 12:46-50; Lu 8:19-21)

³¹*La nenen mi luvutneton ne Iesu diga rupot. Diga tu ro xamang la diga riki lara ri ro xaka i. ³²Buaang limixin digat kis kangkan i la diga tong i rin dola nenen mi luvutneton di puse i.

³³La ne Iesu ga lok, “Nege mo ne naga la nege di luvutnetak?”

³⁴La ne Iesu ga ven tinedi digat kis kangkan i la neni ga lok ti limixin axap keretna, “Na luvuttadi nedi di lok ngan ne naga mi luvutnetak. ³⁵Neni mun i mu asu lavavara at ne Moroa, neni netak koplal neinuk koplal ne naga.”

4

Lavapaase Poovo At Laradi Gatlotlo Piao

(Mt 13:1-9; Lu 8:4-8)

* **3:31:** Mk 6:3; Jo 2:12; Gu 1:14

¹* La melemu ne Iesu ga anasa manga limixin saparap lavatdan kis Galili. Buaang limixin diga umsu la diga esi aleng. Kuren la ne Iesu ga vubeles to xeneng at lese pang la gat kis teren to at lavatdan kis la limixin axap digat kis to loxon la digang tonga i ga paase. ²* La ne Iesu ga tong asu laxampanga solo mi lempapaase poovo, la neni ga tong lavapaase poovo xeretna, ³“Mina ronga avukar i na. Lara laradi gat pas uto xataamang, la gatlotlo levennit piao, ga lulu reve min. ⁴ La lentaba levennit piao ga subu at langa. Lavapixa diga vot la diga rok axav i. ⁵ La lentaba levennit piao ga subu ro at laxanuat la lengkongkangka lixilik mene gak lok teren. Levenit piao ga suu xat soso mun, mila goxopmen taxangka solo. ⁶ Ise laxangking ga losu upana, ga sev amolos axap nom lempiao, mila levenixe atdi goxo si aleng ukopok la nom lempiao suusu diga met axap. ⁷ La lentaba ga subu ro at livin gagas. La nom livin gagas ga suu xat la ga is nom lempiao la levempiao goxo visik. ⁸ La lentaba ga subu ro at loxongkangka avukat la ga suu xat, la ga suusu avukat, la melemu ga visik laxampeven teren. Lentaba ga visik lavantun sangaun, lentaba ga visik lavanna sangaun, lentaba ga visik legesa sangaun kobot (100).”

⁹ La ne Iesu ga lok bok tidi xeretna, “Mina doxoma avukat nom levelinga rak kusu mina xasep teren.”

*Iesu Ga Paase Mumu Lempasuun At
Lempapaase Poovo*

(Mt 13:10-17; Lu 8:9-10)

¹⁰ Melemu ne Iesu gak lok mi lavaun pinivu ren la lentaba petpes bok la nedi xusuk digak lok eburu min la diga sue i mi lempapaase poovo. ¹¹ La ne Iesu ga vorang i ridi xeretna, “Moroa ira raba vam nimi mi lakleklen at

* 4:1: Mk 3:7-9; Lu 5:1-3 * 4:2: Mt 13:34; Mk 4:33-34

Linintoo at ne Moroa, gano ga nemen aliipe. Ketla tinedi maxamang, di ronga mene lempapaase poovo. ¹² *Ni ik lox i xuren kusu,
 ‘Nedi di reven lugugu, ketla di noxo ven kibis i. Ding tonga mo levelinga, ketla di noxo xasep teren. Do dina xasep, diba leeng la ne Moroa na doxoma xepe leveloklok kakapmek atdi.’ ” *Ais 6:9-10*

Iesu Ga Tong Asu Lavasuun At Lavapaase Poovo

(Mt 13:8-23; Lu 8:11-15)

¹³ La ne Iesu ga lok bok tidi xeretna, “Kereva, kopmen mina xasep at na lavapaase poovo? Do mixo xasep at na lavapaase poovo, i lolos do mina xasep at lempapaase poovo vetpes bok, ketla ana tong axasev i nom tinimi. ¹⁴ At na lavapaase poovo mo laradi lotlo i ru katling laradi i tong asu levelinga at ne Moroa. ¹⁵ Lentaba levennit piao ga subu ro at langa i ru katling limixin di ronga levelinga at ne Moroa, ketla ne Satan i tupot soso la ik lok pes i. ¹⁶ Ti levenit piao ga subu ro at laxanuat, lengkongkangka lixilik gak lok teren, ni i ru katling nedi limixin di ronga levelinga la soso mun di siam ka i mi lomomo. ¹⁷ *Ketla ixo vubeles ukeneng at lorooro atdi, la lununu atdi ixo nemen abao solo. Kuren la ise do levenmumuat i vot eburu mi levesongsongot mumu levelinga at ne Moroa, lununu atnedi i subu soso mun. ¹⁸ Ti levenit piao ga subu ro at livin gagas, ni i ru katling nedi limixin di ronga levelinga, ¹⁹ *ketla di bulu mu solo laxampanga at na lorooro la nom lavavara atnedi ri lapnovos, la levereven peves ti lempanga at na lavatkangka i vubeles at lorooro atdi la di itis nom levelinga la dixo visik tempeven una. ²⁰ La ti levennit piao ga subu at laxangka nunuan, ni i ru katling limixin di ronga levelinga at ne Moroa la di siam kaka i

* **4:12:** Jo 12:40; Gu 28:26-27 * **4:17:** Mt 26:31 * **4:19:** Mt 19:23-24

la lempanga avukat i ravasu at lorooro atdi. Lentaba di visik lempeven una i epovo at lavantun sangaun la lentaba lavanna sangaun la lentaba legesa sangaun kobot (100).”

Lavapaase Poovo At Lababao

(Mt 5:15; Lu 8:16-18; 11:33)

²¹* La ne Iesu ga tong bok lavapaase poovo ridi xeretna, “Kereva, mi sox aros lababao la mi vung pavaa i mi lavatbaaket koplama mi lok li maxopok at loora? Kopmen. Mi lok li i ro at loxot kasep. ²²* Lempanga no ga nemen ali pe rinotno, naba ravasu ri lasaxaven. La levelinga, lavasuun teren no i nemen ali pe, melemu naba xasep. ²³ Do tara i ruuna lubaalung ting tonga, neni na rongga avukat na levelinga.”

²⁴* La ne Iesu ga lok bok tidi xeretna, “Minang tonga avukat na levelinga. La lempanga mi lox i rinedi vetpes, neni mun i nom ne Moroa naba raba nimi min, la loxot bok mavana ren. ²⁵* Do tara na siam ka mo levelinga ne Moroa i raba i min, Moroa naba raba box i mi laxasep avukat at levelinga ren. Dola tara noxo siam ka levelinga at ne Moroa, Moroa naba lok pes bok laxasep kakalik teren, keke i do neni i doxoma i do im tebeng i.”

Lavapaase Poovo At

Levennit I Suusu

²⁶ La ne Iesu ga tong asu bok lavapaase poovo ridi xeretna, “Linintoo at ne Moroa i lok keretna. Lara laradi gatlotlo levennit piao ro xataamang, ²⁷* la ni gak midi la ga aus at levenaleng axap. Mo levennit piao ga raut la ga suusu la nom laradi goxoklen i do mo levempiao ga suu kereva. ²⁸ La laxangka axa ga lox asusu mo levempiao. Levempiao ga raut avot, melemu ren levempavaxan teren

* 4:21: Mt 5:15 * 4:22: Mt 10:26; Lu 12:2 * 4:24: Mt 7:2 * 4:25: Mt 13:12
* 4:27: Je 5:7

ga suu xat la melemu nom levennit piao ga visik. ²⁹ *Se mo lempeven teren ga mukun, mo laradi ga riki luvuttadi gugu ren mi lemparise atdi ti sep kin ap mo lempeven piao.”

Lavapaase Poovo

At Levennit Mastet

(Mt 13:31-32,34; Lu 13:18-19)

³⁰ La ne Iesu ga tong asu bok lavapaase poovo ridi xeretna, “Nenia ana tong asu lavapaase poovo rinimi xusu mina xasep at Linintoo at ne Moroa i lok kereva. ³¹ Linintoo at ne Moroa i lok ngan lara laradi ga lok ka levennit mastet la gatlotlo i ro xataamang teren. Nom levennit i xakalik tinotno ti levenit axap at na lavatbung menemen. ³² Do tara natlotlo i, nom levennit ba suu xat silok, la ba silok polo levenuna axap to xataamang. Lengkakan teren ba silok kusu lavapixa bat kis to xeneng at lamamau ren.”

³³ Laxampapaase poovo keretnom ni ga vaase asu i ri limixin axap at nom laaleng. Se diga epovo kusu dinaklen ka levelinga ren, ni ga vaase asu i ridi. ³⁴ Neni ga vavang mi lempapaase poovo xusuk la ni ga tong asu lavasuun at nai ri lavaun pinivu xusuk mene ren.

Iesu Ga Lox Amila

Lavatdan Kis

(Mt 8:23-27; Lu 8:22-25)

³⁵ Ap mo laaleng ga ukantinao ne Iesu ga lok ti lavaun pinivu ren keretna, “Ata sen polo lavatdan kis uto at lenep meo.” ³⁶ La lavaun pinivu diga on basinge buang limixin la diga los kas at lese pang Iesu gat kis teren la diga sen kaxat. Lentaba bok diga sen kaxat mi levesepang atdi. ³⁷ La mo langsung lamanman ga mas lolos la lavatdan kis ga repit aleng la ladan ga vubeles uto xeneng

* 4:29: Jol 3:13; Li 14:15

at lesepang, la ma lixilik lesepang ga lok do na dong si.
³⁸ La ne Iesu gak midi ro melemu at lesepang la ga liingun at lavatliingun. La diga ro aus i la diga lok tin keretna, “Leeme loklox ase. Tila u unga? I auret kusu ata seeve.”

³⁹ La ne Iesu ga xatu kaxat la ga vaase lolos pe lamanman la ga lok ti lavatdan kis keretna, “Unak lok pilo. Una mila.” La lamanman ga xap la lavatdan kis ga mila.

⁴⁰ La ni ga lok tidi xeretna, “Tila nemi mi marat? Kereva, kopmen tununu atnimi?”

⁴¹ La nedi diga sangu aleng la diga epaase xeretna, “Laradi salai na? Lamanman la lavatdan kis dura ronga res at levelinga ren.”

5

Iesu Ga Riki Xepe Lubunggas Basinge Laradi (Mt 8:28-34; Lu 8:26-39)

¹ La ne Iesu mi lavaun pinivu ren diga rupot to loxon ap mo lavatdan kis to at lenep Gerasa. ^{2*} La ne Iesu ga vas su at lesepang la soso mun lara laradi ga vot pasa i. Neni ga laa boro at lenep at larabuang digak mikmit labarongan to xeneng teren. Lagas ga suxuna nom laradi. ³ Neni ga nemen to ap mo larabuang la limixin at nom lenep di goxo epovo ri xoxo alis i mi lavaros sen. ⁴ Gano digak lok tong pen i do dina xoxo alis i mi lavaros sen. Ketla neni ga ba korop nom lavaros sen diga lok li i at lukngen la luxangkedek teren. La tara goxo epovo lolos kusu na ranga alis i. ⁵ At levenaleng axap at levenaleng kangking la at lengkanimin neni gat pas tangtagap to xeneng at larabuang la to at lengkong kaana la ni gap kup silok la ga rivit koxorop labantuxu ren mi lengkonuat.

* 5:2: Mk 1:23

⁶ Se ni ga ven ne Iesu ro vaxalom, ni ga sixit pasa i la ga xis tiktikbu mi luvatgulom teren saparap luxangkedek at ne Iesu. ⁷⁻⁸ *La ne Iesu ga lok tin keretna, “Una on basinge na laradi, nenu lagas kapmek.” La nom laradi gap kup silok ti ne Iesu xeretna, “Iesu, Nitna ne Moroa, Leeme Avolo. U rupot de ri lok lavanga sala ria? Una xaape ri ne Moroa dola u noxo sev asongor ia.”

⁹ La ne Iesu ga sue i, “Nege laasen taram?”

Lagas ga vorang i xeretna, “Laasen tarak ne Limixin Buaang, mila nema buaang lubanggas ma suxuna na laradi.” ¹⁰ La ni ga sing lolos ne Iesu xusu neni noxo riki xepe di uto at lenep kangka vetpes.

¹¹ Buaang laxanbo mo diga nemen auret, diga anan to at lakaana. ¹² La lubanggas diga sing ne Iesu xeretna, “Una riki nama uto ap mo laxanbo la una siam do mana vubeles atdi.” ¹³ La ne Iesu ga ke aonon di la lubanggas diga sixisu basinge mo laradi la diga vubeles at laxanbo. La mo laxanbo diga sixit kaxat la diga sixisi ukopok at lakaana la diga los tup to at lavatdan kis la laxanbo diga xong axap. Nom laxanbo ga epovo at legepu abin sangsangaun kobot (2000).

¹⁴ La nedi diga lok tatao laxanbo diga sixit kaxat uto at lemenemen atdi la diga tong i na lavanga ri limixin me go la to bok at lengkot petpes. La nom limixin diga laa boro at levenmenemen atdi xusu dina ven mo lavanga ne Iesu ga lok pam i. ¹⁵ Diga vot pasa ne Iesu la diga ven laradi, laxan gas ga suxuna i gano, mo gat kis, la ga siga lempanga singsiga la lodoxoma ren ga lox avukat axap la nedi limixin diga marat. ¹⁶ La mo limixin diga vaase asu nom lavanga ne Iesu ga lox i ri nom laradi mi laxanbo. ¹⁷ La nom limixin diga sing lolos ne Iesu dola neni na on basinge mo lenep kangka.

* 5:7-8: Mk 1:24

¹⁸ La ne Iesu ga los kas at lese pang la mo laradi ga sing ne Iesu xeretna, “I epovo do ana emu minu?” ¹⁹ Ketla ne Iesu goxo siam la ga lok tin keretna, “Una onon uto xolonu ram la una tong lavanga salai Leeme Silok i lox i ru, la i lox asuusu lebelen tuntun tu.” ²⁰ *La nom laradi ga on basinge ne Iesu la gat pas tangtagap to at lenep silok Sangaun Menemen la ga tong nom lavanga ri limixin axap. La nedi limixin diga sanga aleng ap mo lavanga ne Iesu ga lox i ri nom laradi.

Iesu Ga Lox Aroo Latkin
(Mt 9:18-26; Lu 8:40-56)

²¹ La ne Iesu gamlong bok polo ro at lavatdan kis mi lese pang. La buaang limixin diga vot pasa ne Iesu to loxon. ²² Lara laradi ga rupot, neni laradi gomgo at loogu singsing, laasen at nom laradi ne Jairas. Ni ga ven ne Iesu la ga xis tiktikbu mi luvatgulom teren saparap luxangkedek at ne Iesu. ²³ *La ni ga sing lolos ne Iesu xeretna, “Loolik tarak i auret do na met. A vara i dola una vot pasa i la una lok li lukngam teren kusu una lox aroo i la neni noxo met.” ²⁴ La ne Iesu ga emu min.

La buaang limixin bok diga emu min la digat pas esi xakape. ²⁵ La lara latkin mo ga nemen. Lanmeres gaaling gak lox amisik teren at levenaleng axap, ga epovo at lasangaun mi legepu maares. ²⁶ Ni gat pot pasa amisik luvuttadi sangsanga ketla diga raba mene i mi levesongsongot la di goxo lok tooro i. Lempilas teren ga xap la mo lanmeres ga sisilok. ²⁷ La ni ga rongga i dola ne Iesu ga lox aroo limixin la neni ga vas mu ne Iesu ro melemu eburu mi limixin la ga rebeng tu at lavanga singsiga ren. ²⁸ *Mila ni ga lok do na long tu at lavanga singsiga ren, la ni ba lox avukat ba.

* 5:20: Mt 4:25; Mk 7:31 * 5:23: Mt 8:3; Mk 7:32 * 5:28: Mt 14:36

²⁹ La soso mun lanmeres teren ga xap la ni ga suma i do ga lox avukat ta.

³⁰ *La soso mun Iesu ga suma i do lolos ga ravasu. La neni ga rem gili la ga sue, “Nege i long tu at lavanga singsiga rak?”

³¹ La lara at lavaun pinivu ren ga vorang i xeretna, “Buaang limixin dit pas eburu minu. Tila u sue do, ‘Nege i long tu at lavanga singsiga rak’, mila a lok do buaang limixin di long tu at lavanga singsiga ram.”

³² La ne Iesu ga milik tangtagap la ga ven pupuse ti nom lara ga long tu at lavanga singsiga ren. ³³ La nom latkin ga umsu mi lanmarat silok, ni ga xasep do lanmeres teren ga xap la ni ga xis tiktikbu mi luvatgulom teren saporap luxangkedek at ne Iesu la ga tong asu lorooro ren tin. ³⁴ *Ketla ne Iesu ga lok tin, “Latkin, lununu ram i lox avukar u. Unat pas at lenmila la lanmeres ira xap tinotno nga.”

Iesu Ga Lox Aroo Loolik

³⁵ La ne Iesu move ga paase mi nom latkin la lentaba luvuttadi diga rupot pasa ne Jairas, laradi gomgo at loogu singising. La diga lok ti ne Jairas keretna, “Loolik taram ira met pam, la nemen uta lox angtang bok ba laradi loklox ase.”

³⁶ Ketla ne Iesu goxo ronga res at levelinga atdi la ga lok ti laradi gomgo at loogu singising keretna, “Nemen uta marat. Una nunu mun tarak.”

³⁷ La ni goxo ke tara xusu na emu min, kusuk mun ne Pita, ne Jems, du leeton mi ne Jon diga emu min uto at loogu at ne Jairas. ³⁸ La diga rupot to at loogu ren la ne Iesu ga ronga limixin diga velas solo, lentaba digang teng silok, lentaba diga saxaanu aleng. ³⁹ La ne Iesu ga vubeles

* 5:30: Lu 6:19 * 5:34: Mk 10:52; Lu 7:50; 17:19

at nom loogu la ga lok tidi, “Nemen mitang teng. Loolik kopmen na met, neni i unga mene nga.” ⁴⁰*La diga lok kalise i.

La ne Iesu ga riki asu di basinge loogu la ni ga lam ka ne temen mi nenen nom loolik eburu mi lavantun lavaun pinivu ren la diga vubeles uto at loxot loolik gak midi ren. ⁴¹*La ni ga ranga axatu i mi lekngen la ga lok tin keretna, “Talita kumi.” Lavasuun teren keretna. Loolik, a tong i ru, una xatu upana. ⁴²La soso mun mo loolik ga xatu upana la gat pas tangtagap ap mo lenep. Levenmaares teren ga epovo at lasangaun mi legepura. La nedi digak lok go, diga sangu aleng tinotno. ⁴³*La ne Iesu ga tong lolos i ridi dola di noxo tong asu nom lavanga ri teta, la ni ga tong i ri ne temen mi ne nenen loolik dola duna raba i mi lempanga anan.

La ne Iesu gat pas tangtagap ti levenmenemen kusu na anasa limixin.

6

Limixin Me Nasaret Diga Raba Rulu Ne Iesu (Mt 13:53-58; Lu 4:16-30)

¹La ne Iesu eburu mi lavaun pinivu ren diga vas kaxat basinge mo lemenemen la diga rupot to at lemenemen aulis teren, Nasaret. ²*At laaleng kaala Iesu ga anasa ro at loogu singising la buaang limixin diga rongga i la diga sangu.

La diga esue xeretna, “Na laradi ga lok ka na lakleklen solo meva? La neni ga lok ka lodoxoma nunuan meva xusu neni i epovo na lok lempanga sangsangu? ³*Neni laradi gugu gu mene la neni ne nitna ne Maria la neni neton ne Jems, ne Joses, ne Judas, la ne Simon, nedi di nemen

* 5:40: Jo 11:11 * 5:41: Lu 7:14 * 5:43: Mk 1:44; 7:36 * 6:2: Jo 7:15
* 6:3: Jo 6:42

de la luvurinen bok di nemen de at na lemenemen.” La kerepmo limixin diga raba rulu ne Iesu.

⁴ *La ne Iesu ga lok tidi xeretna, “Leeme vapaase ali, limixin di lok ngangao ren at lengkot axap, ket to at lemenemen teren, la kantubu at limixin teren la libibinat teren, kopmen dina lok ngangao ren.” ⁵ La ne Iesu goxo epovo na lok lempanga sangsangu go, ketla neni ga lok li lukngen mavana at lentaba mun kusu na lox aroo di. ⁶ La neni ga sangu aleng mila di goxo nunu.

Iesu Ga Riki Lavaun Pinivu Ren Ti Vavang
(Mt 10:5-15; Lu 9:1-6)

⁷ *La ne Iesu ga ro xaka lasangaun mi legepura lavaun pinivu ren la neni ga riki gepgepura di uto at levenmenemen petpes. La neni ga raba di mi lolos kusu dina riki xepe lubunggas basinge limixin.

⁸ *La neni ga vaase pe di xeretna, “Mina lok kaka levengkidak atnimi, ketla nemen mita xip kaka tempanga vetpes bok. Nemen teveluxa, nemen teventat, nemen tevempilas at lempanga lukluxa. ⁹ Mina siga luvanga vatpas, ketla nemen mita xip kaka tempanga singsiga ri etara xun.” ¹⁰ La neni ga lok bok tidi, “Do mina vubeles at tara temenemen miba nemen at legesa gu, se miba on basinge mo lemenemen. ¹¹ *Do limixin di noxo siam ka nemi la di noxo ronga levelinga atnimi, mina on basinge mo lemenemen la mina semla xepe lengkakup at lengkangedek atnimi, i ngan loklok katling tidi xusu ti lox asuusu levenmukmusak at ne Moroa.”*

¹² La lavaun pinivu ren diga vas kaxat uto at levenmenemen la diga vavang do limixin dina leeng. ¹³ *La diga

* 6:4: Jo 4:44 * 6:7: Lu 10:1 * 6:8: Lu 10:4-11 * 6:11: Gu 13:51
* 6:11: Na loklok i lox asuusu i do ne Moroa naba raba lumumuat ti limixin ap mo lemenemen. * 6:13: Je 5:14

riki xepe lubunggas basinge limixin la diga so li ladan avukat at limixin mekmeres ngan loklok at lubung mixin me Judaia la diga lox aroo di.

Lanmet At Ne Jon Laradi Sep Susu Limixin

(Mt 14:1-12; Lu 9:7-9)

¹⁴ *La ne Erodes, loorong at lenep silok Galili ga ronga levelinga at lugugu at ne Iesu, mila laasen at ne Iesu ga onon at levengkot axap. Lentaba diga lok do ne Iesu neni ne Jon, laradi sep susu limixin. Diga lok bok dola ne Jon ga roo xat amlong at lanmet, kuren la neni i epovo na lok lempanga sangsangu.

¹⁵ Lentaba vetpes diga lok keretna, “Neni ne Elaia leeme vapaase ali.”

Lentaba diga lok keretna, “Neni laradi vapaase ali kerekngan lavaeme vapaase ali megano.”

¹⁶ Ketla ne Erodes ga lok keretna, “Neni ne Jon. Nia agara ra korop pam laxaka ren la ni ga roo xat manga.”

¹⁷ Leretere at lanmet at ne Jon keretna. Erodes ga tong i ri luvuttadi esep teren ti ranga alis ne Jon la diga xoxo i la diga lok li i ro at loogu xokoxo. Erodes ga lox i na mila latkin teren ne Erodias ga musak ne Jon. ¹⁸ *Lavasuun at lumukmusak at nom latkin keretna. Ganoxa ne Jon ga vaase sok ne Erodes mila neni ga sak paxat ka ne Erodias, latkin at neton ne Pilip la ga epot teren. ¹⁹ Kuren la ne Erodias ga musak ne Jon la ga vara na sev amer i ketla neni goxo epovo, ²⁰ mila ne Erodes ga marat at ne Jon la ga lok tatao i. Erodes gaklen i do ne Jon lagale laradi manmanton la gang tonga levelinga ren. Neni ga rangku mumu i nom levelinga at ne Jon, ketla ni ga lok momo ring tonga i.

²¹ Ketla ne Erodias ga vuse ka langas ti sev amet ne Jon keretna. At lara laaleng ne Erodes ga lok laanan ti lok

* **6:14:** Mt 16:14; Mk 8:28 * **6:18:** Mas 18:16

katling mo laaleng nenen ga visix i ren. Lavaeme silok at lugugu at ne Erodes mi luvuttadi esep amgomgo ren mi loxongkulao amgomgo bok at lenep Galili digak lok at nom laanan. ²² La lara loono maxat, neni loolik at ne Erodias ga tii, la ne Erodes eburu minedi diga anan diga lok momo ren la ne Erodes ga lok ti nom loono keretna, “Una tong asu lavavara ram ti tavanga la nia aba raba u min.” ²³ *La neni ga lok lavangpangpe rin keretna, “A paase ruturun at lemeren ne Moroa. Nia aba raba u mi tevempanga u vara i, i epovo at loxonatat at lempanga axap tarak.”

²⁴ La mo loono ga sixisu la ga sue nenen keretna, “Lavanga sala nia ba sing ka i ren?”

La ne Erodias ga vorang i xeretna, “Una sing ti lavatlak at ne Jon.”

²⁵ La soso mun nom loono gamlong parap ne Erodes la ga lok, “Una raba ia mi lavatlak at ne Jon laradi sep susu limixin. Una lok li i at tavattingtigon silok.”

²⁶ La ne Erodes ga lok bukbulu aleng mila neni goxopara i do ne Jon na met. Ketla neni goxo epovo xusu ti lox ekun levelinga ren mila nom luvuttadi silok diga ronga vam nom lavangpangpe. ²⁷ La soso mun Erodes ga lox aonon lavapaase ri laradi esep teren do neni na sep korop laxaka at ne Jon la na xip kaka lavatlak teren uto saparav i. La nom laradi ga vas kaxat la ga sep korop laxaka at ne Jon to at loogu xokoxo. ²⁸ La neni ga lok li nom lavatlak to at lavattingtigon silok la ga rupot min la ga raba mo loono min la loono ga raba nenen min. ²⁹ La lavaun pinivu at ne Jon diga ronga i dola ne Jon ga uu la diga rupot la diga lok ka labantuxu ren la digak mir i ro at lubuang mikmit tongan.

* **6:23:** Est 5:3,6; 7:2

*Iesu Ga Raba Buaang Limixin Mi Lempanga Anan
(Mt 14:13-21; Lu 9:10-17; Jo 6:1-14)*

³⁰ *La luvuttadi vavang at ne Iesu digamlong ta la diga tong asu lempanga axap diga lox i la levelinga diga anasa limixin min. ³¹ *La ne Iesu ga lok tidi xeretna, “Ude nimi, nedik kusuk ata onon uto at lamatbin kusu mina lok mamana lixilik be.” Mila buaang limixin diga rupot pasa amisik ne Iesu mi lavaun pinivu ren la di goxo epovo kusu dina anan.

³² La diga sen kaxat mi lese pang uto at loxot petpes, ua limixin di goxo nemen teren. ³³ Ketla buaang limixin diga ven nedi diga sen mi lese pang la diga ven kibis di. Diga pas basinge levenmenemen atdi la diga mumu loxon la diga rupot avot to ap mo loxot ti ne Iesu mi lavaun pinivu ren. ³⁴ *La ne Iesu eburu mi lavaun pinivu ren diga oso mi lese pang la ni ga ven buaang limixin solo. Neni ga balamu di mila diga lok ngan laxasipsip kopmen taradi loklok tatao atnedi. Kuren la ni ga anasa di mi laxampapaase solo.

³⁵ *Ga ukantinao lavaun pinivu at ne Iesu diga rupot pasa ne Iesu la diga lok tin keretna, “Ukantinao nga na la na loxot, ni loxot mimila rino. ³⁶ Una riki aonon limixin kusu dibat pas uto at levenmenemen la dina un ka tempanga anan tidi.”

³⁷ Ketla ne Iesu ga lok tidi xeretna, “Nemi xa mina raba nedi mi teveluxa xusu dina anan i.”

La diga lok tin keretna, “Kereva, u vara i dola manat pas ti un kaka tevengkongkide mi legepu sangaun kobot (200) denarias atdik la mana un panga anan min tidi?” Mo lempilas ga epovo dola tara na gugu at lavanuti gaaling ti lok kaka i nom.

* **6:30:** Lu 10:17 * **6:31:** Mk 3:20 * **6:34:** Mt 9:36 * **6:35:** Mk 8:1-9

³⁸ La ne Iesu ga lok tidi xeretna, “Minat pas la mina ven lavanisa lengkangkide mo ik lok.”

La digaklen ka i la diga lok tin keretna, “Lavalimo lengkangkide la legepu venmat kakalik na.”

³⁹ La ne Iesu ga lok tidi xeretna, “Mina lox axis limixin axap at levenbinam tadi at levennep mi lempivilis avukat teren.” ⁴⁰ La nedi diga xis kopok ap mo lenep, lepentaba legesa sangaun kobot (100) diga xis eburu, lentaba lavalimo sangaun limixin diga xis eburu, nedi axap digat kis kerepmo. ⁴¹ *La ne Iesu ga lok kaka levengkangkide mi luemat, la ga milik aurut uto at laxalibet la ga tong avukat ti ne Moroa. Ga sebek nom levengkangkide la ga raba lavaun pinivu ren min la diga raba limixin min. La ni ga raba bok luemat tidi. ⁴² La limixin axap diga anan la diga an mais. ⁴³ La lavaun pinivu diga luxa lasangaun mi legepura leventat mi leveluxa mo diga an ake i ren. ⁴⁴ La nedi luvuttadi remes diga anan, diga epovo at lavalimo larabin sangaun kobot (5000).

*Iesu Gat Pas To Mavana At Lavatdan Kis
(Mt 14:22-36; Jo 6:15-21)*

⁴⁵ La soso mun ne Iesu ga tong i ri lavaun pinivu ren do dina los kas at lesebang la dinamgo rin uto at lemenemen Betsaida. La ne Iesu ga riki aonon limixin. ⁴⁶ *La neni ga vas kaxat basinge di la ga urut uto vana at lakaana xusu na ngising.

⁴⁷ At laxanimin lesebang at lavaun pinivu gak sixit kantubu at lavatdan kis la ne Iesu xusuk gak lok to loxon. ⁴⁸ La ne Iesu ga ven di, digatlatla lolos mila lamanman gat mas lolos tangarang di. Kantubu at lavantun konaleng la lavanna konaleng at laxanimin ne Iesu ga vas kaxat to mavana mun at lavatdan kis. La ni ga rupot saparap di la

* **6:41:** Mk 7:34 * **6:46:** Lu 5:16; 6:12; 9:28

ga doma i do na vas polo di. ⁴⁹*Ketla at loxonaleng diga ven ne Iesu gat pas to mavana at lavatdan kis, diga lok do neni lороonan panga la digap kup silok, ⁵⁰mila diga ven i la diga marat aleng.

La soso mun ne Iesu ga lok tidi xeretna, “Nemen gat mita marat. Mina lolos. Nenia mun na.” ⁵¹*La neni ga los kas at lese pang la lamanman gara xap matmas ta. La lavaun pinivu ren diga sangu aleng. ⁵²*Levendoxoma atdi ga repe. Di goxoklen lavasuun at lempanga sangsangu ne Iesu ga lox i mi mo lempanga anan.

⁵³La diga xan polo lavatdan kis la diga oso to at lenep kangka Genesaret. ⁵⁴La diga vas su at lese pang, la limixin ap mo loxot diga ven kibis ne Iesu. ⁵⁵La digak sixit uto at lengkot axap ap mo lenep la digamlong mi luvuttadi mekmeres, lentaba atdi diga xip di mi levenora uto at lengkot no ne Iesu gat pas ue. ⁵⁶*La ne Iesu gat pas tangtagap at lengkot axap, levenmenemen kakalik, levenmenemen silok, laxairing bok la diga lok li limixin mekmeres to at lengkot etang. La diga sing ne Iesu do dina long tu at lavanga singsiga ren. La nedi axap diga long tu ren, diga lox avukat axap.

7

Iesu Ga Paase Mumu Leveloklok At Lubung Parisi (Mt 15:1-9)

¹Lentaba lubung Parisi mi luvuttadi loklox ase at Laulis Linga diga vot eburu boro Jerusalem la diga vot pasa ne Iesu. ²*La diga ven lentaba at lavaun pinivu at ne Iesu diga anan mi levengikngen di, ua di goxo gos avot mun be lengkikngen di. La kerepmo lubung Parisi

* **6:49:** Lu 24:37 * **6:51:** Mk 4:39 * **6:52:** Mk 8:17 * **6:56:** Mt 14:36 * **7:2:** Lu 11:38

diga lok do lavaun pinivu diga lox abilinga lorooro atdi.
³ Lubung Parisi mi limixin axap me Judaia diga sogos avot be levengikngen di la melemu diga anan ba, la kerepmo diga mumu asu loklok at lavalabat atdi. ⁴*Loklok bok at lavalabat atdi xeretna. Se digamlong boro at leetang, kopmen di goxo anan se digak lox adadat avot be di. Leveloklok petpes bok diga mumu asu i xeretna. Diga sogos amisik levengkap inin atdi, leventingtigon, la levesosopen.

⁵ La lubung Parisi mi luvuttadi loklox ase at Laulis Linga diga sue ne Iesu xeretna, “Ua lavasuun teren la lavaun pinivu ram kopmen dina mumu asu leveloklok at lavalabat atdik, di anan lempanga anan mi levengikngen di xopmen na dadat?”

⁶ La ne Iesu ga vorang i ridi xeretna, “Leeme vapaase ali at ne Moroa, ne Aisaia ga paase ali mi nom. Neni ga paase ruturun dola nemi luvuttadi loklok sosolom. Ni ga tong li levelinga xeretna,

‘Na limixin di lok ngangao rak mi levelinga mun atdi, ketla lebelen di i vaxalom tino basinge ia. ⁷ Dixo lotu saporav ia mi luruturun la di lox ase mi levelinga at limixin mun.’” *Ais 29:13*

⁸ La ne Iesu ga vaase sok di xeretna, “Mi onon basinge levelinga mumuat at ne Moroa, ketla mim tebeng lolos leveloklok at limixin.

⁹ Mi gugu lolos ti vuse ka tangas ting tonga xepe levelinga at ne Moroa xusu mina mumu asu leveloklok at lavalabat atnimi. ¹⁰*Gano ne Moses ga lok bok keretna, ‘Mina lok ngangao at luvuttemen nimi mi luvutnen nimi. Do tara na paase xapmek ti ne temen kopla nenen, limixin dinaba sev amer i.’ *Pas 20:12*

* **7:4:** Mt 23:25 * **7:10:** Pas 21:17; Lal 5:16

¹¹ Ketla nemi xopmen mina mumu asu mo levelinga at ne Moses, mi mumu asu na levelinga. Mo do tara i ruuna lempanga do ri lok tooro ne temen kopla nenen, nemi mi tong i rin kusu neni na mumu asu leveloklok at lavalabat la na raba ne Moroa min la na ke loklok tooro ridu. ¹² Kuren la mi lok pe i xusu neni ixo epovo na lok tooro lavakpakes at ne temen mi nenen. ¹³ La kerepmo mi mumu asu loklok miga lok ka i at lavalabat atnimi la mi lox abulubun kepe levelinga at ne Moroa. La nemi mik lox amisik laxampanga xapmek keretnom.”

Iesu Ga Paase Mumu Lempanga Naba Lox Abilinga Lorooro At Tara

(Mt 15:10-20)

¹⁴ La ne Iesu ga ro xaka limixin uto saparav i la ga lok lavapaase poovo ridi xeretna, “Nemi axap mina ronga na levelinga rak la mina xasep teren. ¹⁵ *Kopmen tavanga ik lok to maxamang at laradi na lox abilinga i. Ketla levempanga, lorooro ren i lox asuusu i, naba lox abilinga i. ¹⁶ [Do mi ruuna levenbaalung, mina ronga avukat na levelinga.]”

¹⁷ La melemu ne Iesu ga on basinge nom limixin la ga vubeles at lara loogu la lavaun pinivu ren diga sue mu i mi mo lavapaase poovo. ¹⁸ La ni ga sue di xeretna, “Kereva, kopmen mina xasep avukat teren? Mina ronga avukar i na. Lempanga anan laradi i anan i, noxo lox abilinga i. ¹⁹ Nom lempanga noxo vubeles at lorooro ren, ketla i vubeles at leventine ren la melemu neni ba lok kepe ba i ukamang at labantuxu ren.” La kerepmo ne Iesu ga tong i do leveluxa axap i lox avukat kusu laradi na anan i.

²⁰ La ni ga lok bok keretna, “Lentaba lempanga, laradi i lox asuusu i boro xeneng at lorooro ren, nom i epovo na lox abilinga lorooro ren. ²¹ Mo lempanga xeretna.

* 7:15: Gu 10:14-15

Levendoxoma kapmek, leveloklok kakapmek maxamang at lixitkis epot, loklok tip kip pilo, loklok tip sev amet tara, loklok ti longka, ²² loklok ti belegao, leveloklok kakapmek petpes bok, loklok kaxarang, loklok mun mamangan, loklok ngaongao at lempanga at tara vetpes, loklok ti lox asi tara mi levelinga, loklox asilok, la loklok tangtangu. ²³ Anaa axap lempanga xapmek i ravasu boro xeneng at lebelen laradi la i lox abilinga i.”

Latkin Ga Nunu At Ne Iesu
(Mt 15:21-28)

²⁴ La ne Iesu ga vas kaxat basinge mo lemenemen la ga onon uto at lenep kangka saparap lemenemen Taia. La ni ga vubeles at loogu la ga xopara i do tara naklen i dola neni ira rupot pam. Ketla neni goxo epovo xusu ti nemen lipe. ²⁵ La lara latkin ga rongga levelinga dola ne Iesu ga rupot la soso mun neni ga vot pasa i la ga xis tiktikbu mi luvatgulom teren saparap luxangkedek at ne Iesu. Lagas ga suxuna loolik at nom latkin. ²⁶ Mo latkin, neni me Grik ketla diga visix i ro at lenep Siroponisia. La neni ga sing ne Iesu dola neni na riki kepe lagas basinge loolik teren.

²⁷ La ne Iesu ga tong lavapaase poovo rin keretna, “Nia ana raba panga anan avot mun be ri laxamdak mi laxaalik mila kopmen nak mokso ri lu raba lubangman* mi lempanga anan at laxamdak.”

²⁸ La nom latkin ga lok ti ne Iesu xeretna, “I ruturun pam, Leeme Silok. Ketla lubangman di anan levenmumus panga anan im subu uto maxopok at loxot anan at laxamdak mi laxaalik.”

²⁹ La ne Iesu ga lok tin, “Lavapaase ram i nunuan, kuren la nenia ara lok kepe vam lagas basinge loolik taram. Unamlong ta uto at loogu ram.”

* **7:27:** Limixin me Judaia diga so asen limixin petpes mi lubangman.

³⁰ La nom latkin gamlong uto xolonu ren la ga vot pasa loolik teren gak midi at loora ren la lagas ga on basinge vam i.

³¹ *La melemu ne Iesu ga vas kaxat basinge lenep kangka Taia, la ga vas polo lenep kangka Sidon uto at lavatdan kis Galili, la ga vubeles at lenep kangka Sangaun Menemen. ³² La lentaba luvuttadi diga lam kaka laradi lubaalung teren ga ba uto saparap ne Iesu. Neni xopmen goxo paase avukat, la diga sing ne Iesu xusu na lok li lekngen teren la na lox avukar i.

³³ *La ne Iesu ga lam ka i la nedu xusuk duga vas basinge nom limixin la ne Iesu ga lok li lusivisip teren at lubaalung at nom laradi la ga xalaubis, la ga long tu at lagam teren, ³⁴ *la ga mas asu lamamas teren la ga lok tin keretna, “Epata.” Lavasuun teren keretna, una rem suang. ³⁵ La lubaalung ap mo laradi ga xasep ba. La mo lavanga ga lok pe lagam teren ga repes la neni ga vaase alabat ba.

³⁶ *La ne Iesu ga tong alolos i ridi dola di noxo tong asu nom lavanga ri teta ketla di goxo ronga res teren, diga vaase asu i ri limixin axap. Amisik ne Iesu gap sep pepe limixin kerepmo, ketla amisik limixin diga tong asu lempanga sangsangu ne Iesu ga lox i. ³⁷ *La nom limixin diga sangu aleng la diga lok keretna, “Lempanga axap ne Iesu ik lox i, i nunuan aleng. Ni i lox axasep levenbaalung at luvuttadi ba la i lox aroo luvuttadi kopmen dina paase.”

8

Iesu Ga Raba Luxa
Buaang Limixin
(Mt 15:32-39)

* 7:31: Mt 15:29-31 * 7:33: Mk 5:23; Lu 4:40; 13:13 * 7:34: Mk 6:41;
Jo 11:41 * 7:36: Mk 1:43-45 * 7:37: Ais 35:5

¹ Ap mo levenaleng, buuang limixin diga vot eburu saparap ne Iesu la goxopmen tempanga anan atdi. La ne Iesu ga ro kaka lavaun pinivu ren la ga lok tidi xeretna, ²*“Nenia a balamu na limixin atla digak lok saparav ia at lavantun aleng ta la kopmen tempanga anan atdi. ³ Do ana riki aonon di uto at laramenemen atdi, tentaba diba meroxon to at langa e mi lantoxo atla lentaba diga rupot boro vaxalom.”

⁴ La lavaun pinivu diga lok tin keretna, “Kopmen tempanga anan nade at na lenep gamasa, ataba lok ka tempanga anan ua ridi?”

⁵ La ne Iesu ga sue di, “Lavanisa lengkongkide mi ruuna i?”

Diga vorang i, “Lavanuti na lengkongkide.”

⁶ La ne Iesu ga tong i ri mo limixin do dina xis kopok at laxangka la neni ga lok ka mo lengkongkide, ga tong avukat ti ne Moroa la ga sebex i. Ni ga raba lavaun pinivu min kusu dina raba mo limixin min, la diga lox i xuren. ⁷ Lavaun pinivu diga ruuna bok lutpen mat lixilik. Iesu ga lok ka i la ga tong avukat ti ne Moroa la ga tong i ri lavaun pinivu do dina raba limixin min. ⁸ La limixin diga anan la nedi axap diga an mais. La lavaun pinivu diga lok ka lavanuti levantat silok la diga suxa aumsu di mi lempanga anan limixin diga an ake ren. ⁹ La mo luvuttadi remes ga epovo at lavanuet larabin sangsangaun kobot (4000), la ne Iesu ga riki aonon di. ¹⁰ La soso mun ne Iesu mi lavaun pinivu ren diga los kas at lese pang la diga sen kaxat uto at lenep kangka Dalmanuta.

¹¹ *La lubung Parisi diga vot pasa ne Iesu la diga etep mi levelinga. Diga vara i dola ne Iesu na lok tempanga sangsangu ngan loklok katling boro vana at laxalibet ti

* 8:2: Mk 6:34-44 * 8:11: Mt 12:38

lox asu ba i dola ne Moroa ga riki i. ¹² *La ne Iesu ga lok bukbulu la ga lok tidi xeretna, “Ua lavasuun teren la limixin at na loola di vara lavanga sangsangu? Nenia a noxo lox ase nimi mi tempanga sangsangu.” ¹³ La ne Iesu mi lavaun pinivu ren diga on basinge di la diga los kas manga at lese pang la diga sen polo lavatdan kis.

¹⁴ La lavaun pinivu diga domampe lempanga anan atdi, ketla legeso xongkide mene mo gak lok tidi xeneng at lese pang. ¹⁵ *La ne Iesu ga lok tidi xeretna, “Mina lok tatao avukat nimi basinge liis (yeast)* at lubung Parisi mi ne Erodes.”

¹⁶ La lavaun pinivu diga epaase kantubu atdi xeretna, “I vaase mo levelinga mila nedik kopmen ata lok ka tengkongkide.”

¹⁷ *La ne Iesu ga xasep at levelinga atdi la ga lok tidi xeretna, “Move mi paase mumu lengkongkide, mixoklen lavasuun at levelinga rak. Levendoxoma atnimi ira rebonot pam. ¹⁸ *Miga ven pam lugugu rak la miga ronga vam levelinga rak, ketla mixoklen lavasuun teren. Mina domangke at lempanga sangsangu rak. ¹⁹ *Nenia aga raba buaang limixin ga epovo at lavalimo larabin sangsangaun kobot (5000) mi lavalimo lengkongkide. Melemu lavanisa leventat miga suxa i mi levengkonatat panga anan?”

La diga vorang i, “Sangaun mi legepura axap.”

²⁰ *La neni ga sue bok di, “Nenia aga raba buaang limixin ga epovo at lavanuet larabin sangsangaun kobot (4000) mi lavanuti xongkide la melemu lavanisa leventat silok miga suxa i mi levenmumus panga anan?”

* **8:12:** Lu 11:29 * **8:15:** Lu 12:1 * **8:15:** Liis i ru katling levenanasa at lubung Parisi mi ne Erodes. * **8:17:** Mk 6:52 * **8:18:** Jer 5:21; Mk 4:12; Gu 28:26 * **8:19:** Mk 6:41-44 * **8:20:** Mk 8:6-9

La diga lok, “Lavanuti axap.”

²¹ La neni ga lok tidi, “Kereva, nemi move mixo xasep at levelinga rak?”

Iesu Ga Lox Aroo Laradi Luxatli Ren Ga Main

²² La ne Iesu mi lavaun pinivu ren diga rupot to at lemenemen Betsaida. La limixin meve diga lam ka lara laradi luxatli ren ga main uto saparap ne Iesu, la diga sing i xusu neni na long tu ren kusu na lox avukar i. ²³ La ne Iesu ga rebeng tu at lekngen la ga lam ka i ukamang basinge nom lemenemen. La ni ga xalaubis luxatli ren, la ga lok li lukngen teren la ga sue i xeretna, “U ven tempanga?”

²⁴ La nom laradi ga milik urut la ga lok keretna, “A ven luvuttadi, ketla a ven di ngan larauna dit pas.”

²⁵ La ne Iesu ga lok li amu lukngen at luxatli ap mo laradi. La ni ga milik lolos la luxatli ren ga lox avukat la ga ven axasep ba. ²⁶ *La ne Iesu ga riki aonon i uto at loogu ren la ga lok tin, “Nemen uta vubeles at na lemenemen.”

Pita Ga Tong I Do Ne Iesu Lanarong At Ne Moroa

(Mt 16:13-20; Lu 9:18-21)

²⁷ La ne Iesu eburu mi lavaun pinivu ren diga vas kaxat uto at levenmenemen at lenep kangka Sisaria Pilipai. To at langa neni ga sue di xeretna, “Limixin di lok do nenia nege?”

²⁸ *La diga vorang i xeretna, “Lentaba di lok do nenu ne Jon laradi sep susu. Lentaba di lok do nenu ne Elaia. Lentaba di lok do nenu lara leeme vapaase ali megano.”

²⁹ *La ni ga lok tidi, “Kereva ba nimi? Nemi mi lok do nenia nege?”

La ne Pita ga vorang i xeretna, “Nenu Lanarong at ne Moroa.”

* **8:26:** Mk 7:36 * **8:28:** Mk 6:15 * **8:29:** Jo 6:68-69; Mk 9:9

³⁰ La ne Iesu ga vaase lolos tidi dola di noxo tong asu i na ri teta.

*Iesu Ga Paase Mumu
Lanmet Teren*

(Mt 16:21-28; Lu 9:22-27)

³¹ Melemu ne Iesu ga ru xaka levelinga ren keretna, “Nenia, Laradi Mevana, anaba xip levesongsongot silok. La loxongkulao silok at limixin me Judaia, lavamaasa silok, luvuttadi loklox ase at Laulis Linga dinaba sok tixirixes kepe ia la dinaba sep amer ia la melemu at lavantun aleng nenia anaba roo xat amlong.” ³² La ne Iesu ga vaase axasep nom lavanga ridi la ne Pita ga lam kaka ne Iesu basinge lavaun pinivu la ga vaase sok ne Iesu.

³³ La ne Iesu ga ru pukus la ga ven ti lavaun pinivu ren la ga vaase sok ne Pita. Neni ga lok keretna, “Satan, uto basinge ia. U xopara na mu asu lodoxoma at ne Moroa, ketla u vara mun levendoxoma at limixin.”

³⁴ *La ni ga ro xaka limixin mi lavaun pinivu ren la ga lok tidi, “Mo do tara i vara na emu eburu minia, neni na domampe lorooro axap teren la na gagas li i xusu nap kip losongsongot at levenaleng axap la na mumu asu ba ia.

³⁵ Do nege i vara na ranga alis lorooro ren, neni naba sang apkav i. Ket do nege i soxope lorooro ren ti mumu asu ia la ti tong asu Lagale Lavavang, neni naba lok kaka lorooro avolo. ³⁶ I lok kapmek do taradi na ruuna ka lempanga axap at na lavatbung menemen, la neni i subu basinge lorooro at ne Moroa. ³⁷ Laradi xopmen na epovo na un ka lorooro avolo. ³⁸ *Mo do taradi na lok mamangan kepe ia eburu mi levelinga rak kantubu at limixin at na loola, nenia, Laradi Mevana, anaba sok tixirixes i ap mo laaleng nenia ana si ukopok mi lisisixam silok at ne Tamak la at lubungangelo ren.”

* 8:34: Mt 10:38-39 * 8:38: Mt 10:33

9

¹*La ne Iesu ga lok tidi xeretna, “Nenia a tong tuturun i rinemi, lentaba di tu de, di noxo met avot ti lovtopot at laaleng Linintoo at ne Moroa na vot mi lolos teren.”

Moroa Ga Lox Arepukus
Ne Iesu

(Mt 17:1-13; Lu 9:28-36)

² La melemu at lavanna levenaleng ne Iesu ga lam kaka ne Pita, ne Jems, la ne Jon la diga urut uto vana at lavatkaana silok, nedi lavanuet mun digat pas. Ap mo loxot ne Moroa ga lox arepukus ne Iesu to melamgo at lavaun pinivu ren, ³ la lempanga singsiga ren gan bun tinotno. Limixin mede at lavatbung menemen kopmen na epovo ri lox abunbun tempanga singsiga xerepmo. ⁴ La soso mun ne Elaisa mi ne Moses duga rupert to melamgo atdi la duga epaase eburu mi ne Iesu.

⁵ La ne Pita ga lok ti ne Iesu xeretna, “Rabai, i lox avukat tinotno do mak lok de. Mana lok tavantun taraogu xukuxut, tara ru, tara ri ne Moses la tara ri ne Elaisa.” ⁶ Mo levelinga at ne Pita goxo sixit avukat mila neni la ne Jems la ne Jon diga marat aleng.

⁷*La lusugao ga ravasi la ga vung pavaa di la diga rongaxaxaka boro at lusugao ga lok keretna, “Neni na ne nuruk, nenia a balamu i. Mina mumu asu levelinga ren.”

⁸ La soso mun diga ven ekula midi la di goxo ven ta ne Moses mi ne Elaisa, nedi mene nga lavantun diga nemen mi ne Iesu.

⁹*La diga si ukopok at lavatkaana la ne Iesu ga sep pepe di do di noxo tong asu na lavanga ri teta se at laaleng Laradi Mevana naba roo xat amlong. ¹⁰ La di goxo tong asu

* **9:1:** Mk 13:30 * **9:7:** Mt 3:17; 2 Pi 1:17-18; Lal 18:15; Gu 3:22 * **9:9:** Mt 12:16; Mk 8:30

i nom, ketla diga esue amisik mi ua lavasuun at levelinga at lorooro amlong.

¹¹ La diga sue ne Iesu xeretna, “Ua lavasuun teren la luvuttadi loklox ase at Laulis Linga di tong i dola ne Elaisa naba rupot avot ti Lanarong?”

¹² *La ne Iesu ga vorang i ridi xeretna, “I ruturun, levelinga at ne Moroa i tong i do ne Elaisa naba rupot avot tin la na lox amokso amlong lempanga axap. Ketla mina doma na levelinga ik lok at Lovoang Kaala, i lok dola Laradi Mevana naba xip laxasongsongot la limixin dinaba sok tixirixes i. ¹³ *Ketla a tong i rinemi, Elaisa ga rupot pam. Ketla limixin diga lok lempanga xapmek tin, kerekngan diga vara i, la Lovoang Kaala i tong asu i na.”

Iesu Ga Riki Xepe Lagas Basinge Lamdak
(Mt 17:14-21; Lu 9:37-43)

¹⁴ La ne Iesu eburu minedi lavantun diga si la diga vot pasa lavaun pinivu la diga ven buaang limixin diga tu kangkan di mi luvuttadi loklox ase at Laulis Linga diga vetep mi levelinga eburu minedi. ¹⁵ La soso mun nom limixin axap diga ven ne Iesu la diga sangu aleng la digak sixit la diga seega rangarang i.

¹⁶ La ne Iesu ga sue di, “Mi epaase mu lavanga salai?”

¹⁷ La lara laradi xantubu at nom limixin ga vorang i rin keretna, “Leeme loklox ase, ma paase mumu ne nuruk. Nia a lok do ana lam kaka i saparav u atla lagas i suxuna i la nuruk kopmen na paase. ¹⁸ I se mo lagas ip sev i, neni i sasava gamasa labantuxu ren at laxangka la lemeseng ip tavasus at lungusno, i rungur igisa, la labantuxu ren i tu todoslo. La a sing lavaun pinivu ram dola dina riki xepe lagas basinge i, ketla dixo epovo.”

* **9:12:** Mal 4:5; Sam 22:1-18; Ais 53:3 * **9:13:** Mt 11:14

¹⁹ La ne Iesu ga ronga nom levelinga la ni ga tong i ridi xeretna, “Nemi limixin at na levenaleng, kopmen tununu atnemi. Lavanisa aleng tinotno nenia aba xip tutu minemi? Nemi mi lox amolo ia. Mina lam ka lamdak ude.”

²⁰ La diga lam ka nom lamdak saparap ne Iesu. At loxonaleng lagas ga ven ne Iesu, soso mun lagas ga lox adede nom lamdak la nom lamdak ga subu ukopok at laxangka la gap kuvun la lemeseng ga ravasu at lungusno ren.

²¹ La ne Iesu ga sue ne temen keretna, “Lavanisa maares ni gak lok keretna?” La ne temen ga vorang i, “Ga lamdak lixilik axa i min. ²² Amisik axa lagas i soso aruv i at laxao la at laradan la ik lok dola nap sev amer i. Dola u epovo, una balamu nama la una lok tooro nama.”

²³ *La ne Iesu ga lok tin, “Nemen uta vaase mi na levelinga dola u epovo xeretnom. Moroa naba lok lempanga axap tu, mo do u nunu ren.”

²⁴ *La soso mun temen mo lamdak ga xup keretna, “A nunu ram, ketla lununu rak ixo epovo, una lok tooro lununu rak.”

²⁵ La ne Iesu ga ven i dola buaang limixin digak sixit pot, la ni ga vaase lolos ti nom lagas keretna, “Nenu lagas, ugak lox angtangu na lamdak la uga lox aba i. Nia a tong i ru, una ravasu basinge na lamdak la nemen bok ba utamlong mu i.”

²⁶ *La mo lagas ga xup silok la ga lox adede lamdak la ga sixisu basinge i. La lamdak ga lok ngan ta do ga met la buaang limixin diga lok do ira met pam. ²⁷ Ketla ne Iesu ga ranga ka lekngen la ga rebeng axatu i, la lamdak ga xatu upana.

²⁸ La melemu Iesu mi lavaun pinivu diga vubeles at loogu la nedi xusuk digak lok to xeneng. La nedi diga sue

* **9:23:** Mt 21:21; Mk 11:23 * **9:24:** Lu 17:5 * **9:26:** Mk 1:26

i xeretna, “Ua lavasuun teren la nema maxo epovo xusu mana riki kepe mo lagas?”

²⁹ La ni ga lok tidi, “Lisingising kusus mene impana ri riki xepe lagas kapmek keretnom.”

Iesu Ga Paase Mumu Manga Lanmet Axa Ren

(Mt 17:22-23; Lu 9:43-45)

³⁰ *Iesu eburu mi lavaun pinivu ren diga vas kaxat basinge mo lenep la digat pas polo lenep silok Galili. La neni goxopara i xusu tara naklen i do neni ua, ³¹ *mila neni ga anasa lavaun pinivu ren. La neni ga lok tidi xeretna, “Nenia Laradi Mevana la lara laradi naba song araba ia ri limixin kakapmek kusu dinaba sev amer ia. La melemu at lavantun aleng anaba roo xat amlong.” ³² *Ketla lavaun pinivu ren di goxo xasep at levelinga ren la diga mangan kusu dina sue i mi lavasuun teren.

Lavaun Pinivu Diga Paase Mumu Nege I Silok Atdi

(Mt 18:1-5; Lu 9:46-48)

³³ La ne Iesu eburu mi lavaun pinivu ren diga rupot to Kaprenaum la diga vubeles at loogu la ne Iesu ga sue di, “To at langa mi epaase mi la?” ³⁴ Ketla digoxo vorang i mila diga epaase xantubu atdi do, nege lara i silok atdi.

³⁵ *La ni ga xis kopok, la ga ro ka di lasangaun mi legepura lavaun pinivu ren la ga lok tidi xeretna, “Dola tara i vara i xusu neni na silok, neni ba mumu pit la na lok ngan lasaxaruki at limixin axap.”

³⁶ La neni ga lam ka lara lamdak kakalik, la ga vaxaru i kantubu atdi, la ga ot kongkoda ka i la ga lok tidi xeretna, ³⁷ * “Do nege i seega rangarang tamdak keretna at laasen tarak, i lok ngan ta do neni i seega rangarang ia. La

* **9:30:** Jo 7:1 * **9:31:** Mk 8:31; 10:32-34 * **9:32:** Lu 9:45; 18:34

* **9:35:** Lu 22:24; Mt 20:25-27; Mk 10:43-44 * **9:37:** Mt 10:40

do nege i seega rangarang ia, i lok ngan ta do i seega rangarang mo lara ga riki ia ude.”

*Do Tara Na Lok Tavanga At Laasen Tarak
Ni Lentangas Tarak
(Lu 9:49-50)*

³⁸ *La ne Jon ga lok tin, “Leeme loklox ase, nema maga ven laradi ga riki xepe lubunggas basinge limixin mi laasen taram. La neni kopmen na mumu asu nedik, la kerepmo nema maga sep pepe i.”

³⁹ *La ne Iesu ga lok tin, “Nemen mi guta sep pepe i. Do tara taradi i lok tavanga sangsangu mi laasen tarak, neni noxompana ti paase xapmek soso mumu ia. ⁴⁰ *Do taradi i ru ebelen minedik, neni lentangas atdik. ⁴¹ *Nia a tong tuturun i rinimi. Do tara na raba nimi mi toxodan ti inin mila nemi at ne Karisito, neni noxo sang apkap luunun teren.”

*Loklok Tong Pen Ti Laxapmek
(Mt 18:6-9; Lu 17:1-2)*

⁴² La ne Iesu ga lok ti lavaun pinivu ren keretna, “Naba lok kapmek ti tara do na lox asubu tara atdi na laxamdak kakalik di nunu rak. Naba lox avukat tin do dina xoxo li tangsangan tuuat to at laxaka ren la dina dong asi i min uto xopok at lisimaramain.

⁴³ *Mo do lakngam na lox asubu lununu ram, una ra korop pes i. I lox avukat do una beles at lorooro avolo mi legesakngam mene nga. Lavanga ne Moroa na lu arup minu eburu mi lukngam uto at laxao at lemenemen songsongot, mo laxao i nemen amisik. ⁴⁴ [Ap mo lenep

* **9:38:** Kex 11:27-29 * **9:39:** 1 Ko 12:3 * **9:40:** Mt 12:30; Lu 11:23
* **9:41:** Mt 10:42 * **9:43:** Mt 5:30

leven got naba nemen amisik at labantuxu la noxo remet la laxao bok noxo xap.]

⁴⁵ Mo do laxangedek taram na lox asubu lununu ram, una ra korop pes i. I lox avukat do una beles at lorooro avolo mi legesa xangedek mene nga. Lavanga ne Moroa na lu arup minu eburu mi luxangedek taram uto xeneng at lemenemen songsongot. ⁴⁶[Ap mo lenep leven got naba nemen amisik at labantuxu la noxo remet la laxao bok noxo xap.]

⁴⁷ *Mo do legesa xatli ram na lox asubu lununu ram, una lik gogo su min la una lu xepe min. I lox avukat una vubeles to at Linintoo at ne Moroa mi legesa xatli mene nga. Lavanga ne Moroa na lu arup minu eburu mi luxatli ram uto xeneng at lemenemen songsongot.

⁴⁸ ‘Ap mo lenep leven got naba nemen amisik at labantuxu la noxo remet la laxao bok noxo xap.’” *Ais 66:24*

⁴⁹ La ne Iesu ga lok lavapaase poovo ridi xeretna, “Limixin axap dinaba suma losongsongot ti lox alolos lununu atdi. I lok ngan laxakures di lok li i xusu leveluxa na so avukat.

⁵⁰ *Laxakures neni lavanga avukat. Ket do lolos teren na xap, kopmen bok ba tangas kusu diba lox i la na so xakures manga. Kuren la lorooro atnimi na umsu mi leven gugu nunuan kusu minaba tu buru at limila.”

10

*Iesu Ga Paase Mumu Lababa Korop Epot
(Mt 19:1-12; Lu 16:18)*

¹ La ne Iesu mi lavaun pinivu ren diga on basinge nom lemenemen la digat pas uto at lenep silok Judaia la diga

* **9:47:** Mt 5:29 * **9:50:** Mt 5:13; Lu 14:34; Kl 4:6

vas korop ladan sen Joridan. La buaang limixin diga vot pasa manga i la ni ga anasa di ngan loklok teren.

² La lentaba lubung Parisi diga rupot la diga lok tong pen i mi lususue xeretna, “Kereva, Laulis Linga atdik i mulus bok kusu tara na soxope latkin teren?”

³ La ne Iesu ga vorang i ridi mi lususue xeretna, “Mo lavapaase at ne Moses ga paase xereva at lababa korop epot?”

⁴ *La diga vorang i xeretna, “Moses ga raba nama mi levelinga do tara na malagan tevelinga axasep ti latkin teren do neni mo i xopara na epot ta ren la na riki xepe i.”

⁵ *La ne Iesu ga lok tidi xeretna, “Moses ga raba nimi mi nom, mila lebelen at lavalabat atnimi ga metarauat. ⁶ Ketla ganoxa at lurutu kaxat Moroa ga rudum lavatlok la lavakin, ⁷ *la ne Moroa ga lok keretna, ‘Lavasuun mun at nai la laradi remes naba on basinge ne temen mi nenen la nak lok eburu mi latkin teren. ⁸ La nedu dunak lok eburu ngan mun legesara keneng at labantuxu atdu, la du noxo lok ngan bok ba legepura, ketla legesara mun.’ ⁹ Kuren la tara noxo ba korop leepot at leremes mi latkin teren, mila ne Moroa axa ga ven etang du.”

¹⁰ Melemu ne Iesu mi lavaun pinivu ren digak lok to at loogu, la diga sue i mi mo levelinga ren at loklok at leepot. ¹¹ *La ni ga lok tidi xeretna, “Do laradi i soxope latkin teren, la i epot manga at lara latkin petpes, neni ira longka vam la i lok laxapmek ti latkin avot teren. ¹² Do tatkin na soxope latlok teren la na epot ka taradi vetpes, neni ira longka vam mi nom laradi.”

* **10:4:** Lal 24:1-4; Mt 5:31 * **10:5:** Lur 1:27; 5:2 * **10:7:** Lur 2:24; Ep 5:31
* **10:11:** Mt 5:32

*Iesu Ga Lox Anarong Laxamdak Mi
Laxaalik Kakalik
(Mt 19:13-15; Lu 18:15-17)*

¹³ At lara laaleng lentaba limixin diga lam kaka laxamdak mi laxaalik kakalik atdi uto saparap ne Iesu xusu ni na lok li lukngen mavana atdi la na lox anarong di. Ketla lavaun pinivu ren diga sep pepe di. ¹⁴ La ne Iesu ga ven i nom la ga vaase sok lavaun pinivu ren, ga lok tidi xeretna, “Mina ke laxamdak mi laxaalik kakalik dina vot pasa ia, la nemen mita sep pepe di, mila Linintoo at ne Moroa i epovo ridi na. ¹⁵ *A tong tuturun i rinimi. Do nege xopmen na siam kaka Linintoo at ne Moroa xerekngan lamdak kakalik, neni noxo beles teren.” ¹⁶ La ne Iesu ga rebeng kaka nom laxamdak mi laxaalik getgesara la ga lok li lukngen mavana atdi la ga lox anarong di.

*Iesu Ga Paase Mi Laradi Ga Ruuna Laxampanga Solo
(Mt 19:16-30; Lu 18:18-30)*

¹⁷ La ne Iesu ga vas kaxat uto at lenep petpes la lara laradi ga sixit pot, la ga xis tiktikbu mi luvatgulom teren to melamgo at ne Iesu la ga lok tin keretna, “Leeme loklox ase avukat. Nenia ba lok lavanga sala, kusu anaba lok kaka lorooro avolo?”

¹⁸ La ne Iesu ga lok tin keretna, “Tila u tong ia do a lox avukat? Kopmen tara na lox avukat ketla ne Moroa xusuk mun. ¹⁹ *Uklen pam lasangaun Levenaulis Linga i lok keretna.

‘Nemen uta sev amet tara, nemen utang longka tixin, nemen uta xip pilo, nemen uta vaase xaxarang mumu tara, nemen uta xarang kaka tempanga at tara vetpes, una lok ngangao at ne tamam mi ne nenam.’”

Pas 20:12-16

* 10:15: Mt 18:3 * 10:19: Lal 5:16-20; 24:14; Je 5:4

²⁰ La mo laradi ga lok ti ne Iesu xeretna, “Leeme loklox ase, ga ruka i, laau ia, aga mumu asu vam na levelinga.”

²¹ *La ne Iesu ga ven tooro i la ga balamu i la ga lok tin keretna, “Nenu move uk pakes ti tegesa vanga. Una sesep mi lempanga axap taram la una raba lempilas at nai ri limixin banbalo la unaba ruuna ka lapnovos silok to vana at laxalibet. La melemu una mumu asu ba ia.”

²² La nom laradi ga milik angtungun la ni ga vas kaxat mi lainbulu silok mila neni gap novos aleng.

²³ *La ne Iesu ga ven tangtagap la ga lok ti lavaun pinivu ren keretna, “Naba lolos aleng ti luvuttadi dip novos kusu dina vubeles at Linintoo at ne Moroa.”

²⁴ La lavaun pinivu ren diga sangu at na levelinga ren. La ne Iesu ga lok bok tidi, “Loxongkulao, i lolos aleng do tara na vubeles at Linintoo at ne Moroa. ²⁵ I lolos aleng ti lakamel kusu na beles at lamamara at linil, la kerepmo i lolos aleng bok ti laradi nopnovos kusu ti beles at Linintoo at ne Moroa.”

²⁶ La lavaun pinivu ren diga sangu aleng at nom levelinga la diga epaase xeretna, “Nege i epovo ba do na lok ka lorooro avolo?”

²⁷ La ne Iesu ga ven tooro di la ga lok tidi xeretna, “Kopmen na epovo do laradi na lox i na, ketla i epovo do ne Moroa na lok lempanga axap.”

²⁸ La ne Pita ga lok tin, “Kereva ba nema, maga on basinge vam lempanga axap atnama kusu mana mumu asu u.”

²⁹ La ne Iesu ga lok tidi xeretna, “A tong tuturun i rinimi. Do tara na on basinge lemenemen teren koplaluvutneton koplaluvurinen koplalenen koplaltemen koplalaxamdak mi laxaalik teren koplalleventaamang teren ti lok tooro ia la ri tong asu Lagale Lavavang at

* **10:21:** Mt 10:38; Mk 8:34 * **10:23:** Mk 4:19; 1 Ti 6:17

ne Moroa. ³⁰ Neni naba ruuna xaka luunun silok at na lorooro, i ngan buaang laraogu, buaang luvutneton, buaang luvurinen, buaang luvutnen, buaang laxamdak mi laxaalik, laxantaamang solo. La neni naba lok kaka bok levesongsongot mumu Lagale Lavavang la neni naba rooro amisik at lorooro melemu. ³¹ *Ketla buaang limixin di ruuna levenasen silok at na lorooro, di noxo silok at lorooro melemu. La nedi kopmen dina silok at na lorooro, dinaba silok at lorooro melemu.”

³² *La melemu ne Iesu mi lavaun pinivu ren diga vas kaxat uto Jerusalem. Iesu gam gomgo ridi la diga sangu aleng mumu lavatpas teren. Limixin petpes bok diga mumu asu i, la nedi axap diga marat. La ne Iesu ga lam kaka lasangaun mi legepura lavaun pinivu ren uto vetpes la ga tong i ridi xeretna, ³³ “Nedik ta onon uto Jerusalem la lara laradi naba song araba ia, Laradi Mevana, ri lavamaasa silok eburu mi luvuttadi loklox ase at Laulis Linga. La nedi dinaba lok li ia at lavapaase la dinaba lok li lumumuat tarak kusu nenia ana met. La dinaba song araba ia ri limixin esep boro Rom. ³⁴ La dinaba paase aksaksa ria la dinaba vubis sanga ia la dinabak pixis ia la dinaba sev amer ia. Ketla melemu at lavantun aleng anaba roo xat amlong.”

Jems Mi Ne Jon Duga Sue Ne Iesu Mi Tavanga
(Mt 20:20-28)

³⁵ La ne Jems mi ne Jon, lumdak at ne Sebedi, duga vot pasa ne Iesu la duga lok tin keretna, “Leeme loklox ase, lara lavanga mo ma lok do mana sue u min, la ma vara i do una vorang i rinama.”

³⁶ La ne Iesu ga sue du xeretna, “Lavanga salai muna sing ia min?”

* **10:31:** Mt 20:16; Lu 13:30 * **10:32:** Mk 8:31; 9:31

³⁷ La duga vorang i xeretna, “Una siam do nema manat kis at luxot silok, lara saparap lakngam tino la lara saparap lakngam kia ap mo levenaleng unabat kis kantubu at lisisixam taram.”

³⁸ *La ne Iesu ga lok tidu, “Nemu muxoklen lavanga nemu mu sing tin. Kereva, mu epovo munap kip levenmu-muat ngan nenia anabap kiv i? La mu epovo xusu muna vubeles at langsangan losongsongot nenia anaba vubeles teren?”

³⁹ *La duga vorang i xeretna, “Ma epovo.” La ne Iesu ga lok tidu xeretna, “Munabap kip levenmumuat tarak la munaba vubeles at losongsongot tarak, ⁴⁰ ketla kopmen lugugu rak do nia aba tong i do nege bat kis saparap lakngak tino la saparap lakngak kia. Mo luxot ik lok mun tinedi no ne Tamak gara soxolik ka vam di.”

⁴¹ La lasangaun lavaun pinivu ren diga ronga nom levelinga la diga musak ne Jems mi ne Jon. ⁴² *La ne Iesu ga ro bubua ka nedi axap la ga lok tidi xeretna, “Miklen pam i dola luvuttadi amgomgo at limixin kopmen di me Judaia di ruuna lolos mavana at limixin atdi. ⁴³ *Ketla nemen gat na loklok nak lok kantubu atnimi. Mo do tara atnimi i vara i do na silok, neni na lok ngan lasaxaruki atnemi axap. ⁴⁴ La do tara atnimi i vara i do nam gomgo, neni na lok ngan lasaxaruki gamasa atnimi. ⁴⁵ *Nenia Laradi Mevana la loklok tarak ik lok bok kuren. Nia xopmen a goxo vot kusu limixin dinaba lok ngan lavasaxaruki rak. Ketla nia aga vot kusu ana lok ngan lasaxaruki ridi, la kusu ana raba lorooro rak ngan laxaavuk ti buaang limixin.”

Iesu Ga Lox Arepalas Luxatli At Ne Batimias
(Mt 20:29-34; Lu 18:35-43)

* **10:38:** Mk 14:36; Lu 12:50 * **10:39:** Gu 12:2; Li 1:9 * **10:42:** Lu 22:25-26 * **10:43:** Mt 23:11; Mk 9:35 * **10:45:** 1 Ti 2:5-6

⁴⁶ La ne Iesu eburu mi lavaun pinivu ren diga rupot to at lemenemen Jeriko. La diga vas kaxat basinge nom lemenemen la buaang limixin diga emu midi. La lara laradi laasen teren ne Batimias, nitna ne Timias, gat kis to at lisigege ngas la ga ngising panga mila luxatli ren ga main axap. ⁴⁷*La neni ga rongga i dola ne Iesu me Nasaret gat pas at nom langa, neni gap kup keretna, “Livisik li at ne Devit. Una balamu ia.”

⁴⁸ La buaang limixin diga tong i rin do na lok pilo, ketla neni gap kup silok keretna, “Livisik li at ne Devit. Una balamu ia.”

⁴⁹ La ne Iesu ga ru la ga lok, “Mina ro xaka i ude.”

La diga ro ka mo laradi la diga lok tin keretna, “Una lok momo la una xatu upana. Iesu no i toro ru.” ⁵⁰ La neni ga lok kepe lavanga singsiga me maxamang teren la ga xatu soso la ga vot pasa ne Iesu.

⁵¹ La ne Iesu ga sue i xeretna, “U vara i do nenia na lok lavanga salai ru?”

La nom laradi ga vorang i xeretna, “Rabai. A vara i do luxatli rak na xasep.”

⁵² *La ne Iesu ga lok tin keretna, “Una vas kaxat. Lununu ram ira lox avukat pam u.” La soso mun luxatli ren ga xasep la neni ga emu mi ne Iesu ro at langa.

11

Iesu Ga Vubeles To Jerusalem

(Mt 21:1-11; Lu 19:28-40; Jo 12:12-19)

¹ La ne Iesu mi mo limixin solo digat pas uto auret ta lemenemen Jerusalem, diga rupot to at lumenemen Betpage la Beteni at Lakaana Olip. Iesu ga riki amgo legepura at lavaun pinivu ren. ² Avot be ni ga lok tidu

* 10:47: Mt 9:27; 15:22 * 10:52: Mk 5:34

xeretna, “Munat pas uto at nom lemenemen ik lok to melamgo atnumu. La soso mun munaba long lenget ka lodongki maxat, kovisi tara goxo xis teren. La muna soxomus ka i ude. ³ Dola tara na sue numu do, “Tila nemu mu soxomus ka nom lodongki?” muba lok tin keretna, ‘Leeme Silok i vara i la manaba lok li amlong soso bok ba i.’”

⁴ La nedu duga vas kaxat la duga ven lenget ka lodongki at loogu gak lok saparap langa, diga xoxo li i go la duga soxomus ka i. ⁵ Lentaba diga tu go diga sue du xeretna, “Mu lok lavanga salai, tila mu soxomus ka nom lodongki?”

⁶ La duga vorang i ngan ne Iesu ga tong pam i ridu la nom limixin diga mulus taba du mi lodongki. ⁷ La duga lok kaka lodongki uto saparap ne Iesu la duga lok li levempanga singsiga to vana ren la ne Iesu ga xis teren. ⁸ La nedi axap diga vas kaxat uto Jerusalem. Buaang limixin diga lok li levempanga singsiga atdi ro at langa la lentaba diga ra ka lengkakan bisi boro at leventaamang atdi la diga lok li i at langa. ⁹ Lentaba digat pas to melamgo at ne Iesu la lentaba digat pas to melemu ren. Nedi axap digap kup momo xeretna,

“Leemi asu ri ne Moroa. Luvukat ti mo laradi it pas mi laasen at Leeme Silok. ¹⁰ I lox avukat ti lovtopot at Linintoo at lurubuno avolo atdik ne Devit. Leemi asu aleng ti ne Moroa.” *Sam 118:25-26*

¹¹ La ne Iesu ga vubeles to Jerusalem la gat pas uto at loogu laplavang. Ni ga ven tangtagap at lempanga axap. Ketla ukantinao ren neni eburu mi lasangaun mi legepura lavaun pinivu ren diga sixisu la digat pas uto Beteni.

*Iesu Ga Vaase Poovo Mumu Lubung Mixin Me Judaia
(Mt 21:18-19)*

¹² Ap mo lara laaleng melemu ne Iesu eburu mi lavaun pinivu ren diga vas kaxat basinge lemenemen Beteni,

la ne Iesu ga roxo. ¹³ *La ni ga ven lara luuna pik to vaxalom la mo luuna ga xo vavaxan mene nga. La ne Iesu gat pas kusu na dik ka tevempeven una ren. Ketla goxopmen tevempeven una ren, ga xo vavaxan mene nga, mila goxovisi lagaaling tin ti visik. ¹⁴ *La ne Iesu ga vaase lolos ti nom luuna xeretna, “Nenu u noxo visik bok ba tevempeven una.”* La lavaun pinivu ren diga ronga nom levelinga ren.

*Iesu Ga Vubeles To At
Loogu Laplavang*

(Mt 21:12-17; Lu 19:45-48; Jo 2:13-22)

¹⁵ La diga rupot to Jerusalem la ne Iesu ga vubeles to at loogu laplavang la ni ga xala su mi limixin diga sesep mi lempanga ro xeneng la nedi bok diga unun panga. La ni ga ba gili levenora lili atnedi no digak lox ekun lempilas la ga ba gili levengkonin kitkis atnedi diga sesep mi levenamno.

¹⁶ La neni ga sep pepe bok lentaba vetpes kusu nedi di noxo vas polo ro xeneng at loogu laplavang mi lempanga atdi. ¹⁷ *La ne Iesu ga anasa di xeretna, “Levelinga at ne Moroa ik lok at Lovoang Kaala i lok keretna,

‘Loogu rak dinaba so asen i mi loogu singising ti limixin at levengkot axap.’

Ais 56:7

Ketla nemi mira lok kapmek pam i, i ngan loogu loklox alipe at luvuttadi dip sep paxat ka panga.”

¹⁸ *La lavamaasa silok mi luvuttadi loklox ase at Laulis Linga diga ronga nom levelinga ne Iesu ga tong i. Kuren la diga puse ngas ti sev amer i. Diga marat teren mila limixin axap diga sanga at levenanasa ren.

* **11:13:** Lu 13:6 * **11:14:** Mk 11:20 * **11:14:** Na lavapaase poovo rinedi limixin me Judaia la lavanga salai naba vot parap di do di noxo visik asu teveloklok nunuan. * **11:17:** Jer 7:11 * **11:18:** Mk 14:1

¹⁹ Ga ukantinao nga la ne Iesu mi lavaun pinivu ren diga on basinge lemenemen silok Jerusalem.

*Iesu Ga Paase Mumu Lununu
(Mt 21:20-22)*

²⁰ *Ga maxantamak manga diga vas kaxat la diga ven nom luuna ga mang axap, levenixe bok teren ga mang axap. ²¹ La ne Pita ga doma su at levelinga at ne Iesu la ga lok tin keretna, “Leeme Silok, una ven be nom luuna. Uta paase lolos tin itinongo la na i mang axap pam.”

²² La ne Iesu ga lok tidi xeretna, “Mina nunu at ne Moroa. ²³ *A tong tuturun i rinimi. Do tara na tong i ri na lavatkaana xeretna, ‘Una onon la una subu tup tou at laras,’ la do neni i nunu ruturun keneng at lebelen la lodoxoma ren kopmen na sixit ekarakat, Moroa naba lox i xerepmo. ²⁴ *Kuren la a tong i rinimi. Dola una sing ne Moroa ri tempanga u vara rin, una nunu do ne Moroa na raba u min la neni naba lox i xuren. ²⁵ *At loxonaleng una sing, una doxoma xepe leveloklok kakapmek limixin diga lox i ru, kusu ne Moroa naba doxoma xepe leveloklok kakapmek taram. ²⁶ [Do u noxo domampe leveloklok kakapmek at tara, Moroa noxo doxoma xepe leveloklok kakapmek taram.]”

*Lususue At Loxongkulao Silok At Lubung Mixin Me Judaia
(Mt 21:23-27; Lu 20:1-8)*

²⁷ La ne Iesu eburu mi lavaun pinivu ren diga rupot to Jerusalem. La ne Iesu ga vubeles to xeneng at loogu laplavang la lavamaasa silok mi luvuttadi loklox ase at Laulis Linga mi loxongkulao silok at lubung mixin me Judaia diga vot pasa i. ²⁸ La diga sue i xeretna, “Lavapaase

* 11:20: Mk 11:14 * 11:23: Mt 17:20 * 11:24: Mt 7:7 * 11:25:
Mt 5:23; 6:14-15

axasep atnege nenu u ruuna i xusu ti lox i na lempanga? La nege ga raba u mi nom lolos?”

²⁹ La ne Iesu ga vorang i ridi xeretna, “Ana sue bok nimi mi lara lususue la do mina vorang avukat taba ia min, aba vaase axasep ba nimi, do nenia a lok na lempanga mi lavapaase axasep salai. ³⁰ Leesep susu at ne Jon ga laa meva, boro at ne Moroa xopla boro mun at limixin?”

³¹ La diga epaase xantubu atdi xeretna, “Mo do ata lok do, ‘Boro at ne Moroa,’ neni naba lok tidik keretna, ‘Tila ba mi goxo nunu at levelinga at ne Jon?’ ³² La mo do ata lok, ‘Boro at limixin,’ ata marat bok at limixin, mila di nunu do ne Jon neni leeme vapaase ali.”

³³ Kuren la diga vorang i ri ne Iesu xeretna, “Maxoklen i.” La ne Iesu ga lok tidi xeretna, “Nia bok a noxo tong i rinimi do, nenia a lox i na lempanga mi lavapaase axasep salai.”

12

Lempapaase Poovo Mumu Limixin Silok Me Judaia

(Mt 21:33-46; Lu 20:9-19)

¹ *La melemu ne Iesu ga tong lavapaase poovo ridi xeretna, “Lara laradi gatlotlo laraamang vaen, la neni ga bos kangkan i la ga xe lamamara xusu ti loplok li levendan vaen teren, la melemu ga lok loogu xukuxut. La neni ga raba lentaba luvuttadi min kusu dina lok tatao i la neni gat pas uto at lenep petpes. ² Laaleng ga vot kusu dina dik ka lempeven una at nom laraamang la laradi at laraamang ga riki lasaxaruki ren uto at nom laraamang ti lok kaka lenep at levempeven una. ³ Ketla nom luvuttadi loklok tatao at laraamang diga ranga alis nom lasaxaruki la diga rit pupu i la diga riki amlong kixinax i. ⁴ La nom laradi ga riki manga lara lasaxaruki, ketla diga sep patlak ka i

* **12:1:** Ais 5:1-2

la diga lox amamangan tinotno i. ⁵ La ni ga riki manga lara lasaxaruki la diga sev amer i. La ni ga riki buaang lavasaxaruki vetpes teren. Ketla diga tit pupu lentaba la diga sev amet lentaba.

⁶ *La kopmen bok ba tavasaxaruki ren, ketla nitna xusuk ta mo gak lok, ni ga vavara aleng i. La ni ga nua i dola nom luvuttadi dinaba lok ngangao at ne nitna la ni ga riki ba i.

⁷ Ketla nom luvuttadi loklok tatao diga ven i la diga etong i xeretna, ‘Lamdak akmokso at laradi at na laraamang nom it pas boro. Ata sev amer i, la ataba ruuna ka na laraamang.’ ⁸ *La diga ranga alis i la diga sev amer i la diga lu asu min uto maxamang at nom laraamang.”

⁹ La ne Iesu ga lok bok tidi xeretna, “La nom laradi i ruuna nom laraamang, neni ba lok lavanga salai ridi? Neni naba rupot la na sev amet nom luvuttadi, la na raba nom laraamang vaen ti tentaba tuvuttadi vetpes. ¹⁰ Nemi mi xasep at Lovoang Kaala i lok keretna,

‘Nom luuat luvuttadi xipkip gu diga sok tixirixes kepe i, ga ravasu ngan Luuat Kis la lugugu ren i silok aleng.

¹¹ Leeme Silok axa ga lox i na la i lox avukat aleng at lemeren dik.’” *Sam 118:22-23*

¹² Lavamaasa silok mi luvuttadi loklox ase at Laulis Linga diga puse ngas ti ranga alis i mila digaklen i dola ne Iesu ga paase poovo mumu di. Ketla diga marat at limixin la diga ke ne Iesu la diga vas kaxat basinge i.

*Iesu Ga Paase Mumu
Loklok Kekepe Pilas*

(Mt 22:15-22; Lu 20:20-26)

¹³ *Melemu nedi lubang amgomgo diga riki lubang Parisi mi larapen tangas at ne Erodes kusu dina lok tong

* **12:6:** Mt 3:17 * **12:8:** lb 13:12 * **12:13:** Mk 3:6

pen ne Iesu mi levelinga. ¹⁴ La diga rupot la diga lok tin keretna, “Leeme loklox ase, maklen i do nenu laradi ruturun la u anasa limixin mi leventaangas at ne Moroa la mo levelinga ram ik mokso. Uxo lok tooro legesa binam tadi xusuk mun mila uxo doxoma solo do tara i ruuna laasen silok kopla kopmen. Una tong i rinama do ua lusumsuma ram. Kereva, ik mokso do mana xepe pilas ti ne Kaisar kopla kopmen? ¹⁵ Maba un i xopla xopmen?”

Ketla ne Iesu gaklen levendoxoma xapmek atnedi la ga lok tidi xeretna, “Nemi mi lok tong ia mi levelinga, do? Kaka tuxuven denarias ude. Ana ven be i.” ¹⁶ La diga raba i mi luxuven denarias la ne Iesu ga sue di xeretna, “Lamang la laasen atnege i nemen teren?”

La diga vorang i xeretna, “At ne Kaisar.”

¹⁷ *La ne Iesu ga lok tidi xeretna, “Mina raba ne Kaisar mi levempanga i epovo at ne Kaisar la mina raba ne Moroa mi levempanga i epovo at ne Moroa.”

La diga sangu aleng at levelinga ren.

*Iesu Ga Paase Mumu
Lorooro Amlong*

(Mt 22:23-33; Lu 20:27-40)

¹⁸ *La lubung Sadiusi diga vot pasa ne Iesu. Diga lok do limixin diga met pam, di noxo roo xat amlong. Di ga lok tong pen ne Iesu xeretna, ¹⁹ * “Leeme loklox ase, Moses ga malagan na langas linga rinama. Mo do taradi na met la latkin teren mo i rooro, ketla kopmen taxamdak atdu, neton nom laradi naba epot ap mo lanaa rixin kusu duba visik tamdak ti ruuna ka lempanga ap mo laradi ga met. ²⁰ Ga lavanuti loxoeton. Lara gomgo ga epot, la ga met gamasa kopmen ni goxo visik taxamdak. ²¹ Lara sepsep agepura ga epot manga at nom latkin la neni ga met bok

* 12:17: Ro 13:7 * 12:18: Gu 23:8 * 12:19: Lal 25:5

la goxo visik tamdak. La neton sepsep avantun ga lok box i xuren. ²² La nedi loxoeton axap diga epot at nom latkin la nedi axap diga met la di goxo visik tamdak la melemu mo latkin bok ga met.” ²³ La diga sue ne Iesu xeretna, “At laaleng dola limixin dina xatu kaxat amlong, ti nege rinotno nom latkin, mila nedi axap diga epot teren?”

²⁴ La ne Iesu ga vorang i ridi xeretna, “Nemi mi soogong at na lavanga mila mixo xasep at levelinga xeneng at Lovoang Kaala la mixo xasep at lolos at ne Moroa. ²⁵ Ap mo laaleng limixin dinaba xatu kaxat amlong, di noxo epot. Dinaba nemen naa ngan lubang angelo boro vana at laxalibet. ²⁶ Mumu laxakatu kaxat amlong ne Moses ga vaase axasep tuturun i do luvuttadi met dinaba rooro xat amlong. Ni ga lox asusu i at levelinga mumu luuna laxao gak lok teren. Moroa ga lok tin keretna, ‘Nenia ne Moroa at ne Abaram, Moroa at ne Aisak, la Moroa at ne Jakop.’ *Pas 3:6*

²⁷ Ap mo laaleng ne Moroa ga tong i na, nedi lavantun diga met pam. La neni ne Moroa atnedi limixin di rooro, la kopmen atnedi luvuttadi met. Levendoxoma atnimi xopmen nak mokso.”

*Levelinga Silok At
Lovoang Kaala*

(Mt 22:34-40,42-45; Lu 10:25-28; 20:41-44)

²⁸ *Lara at luvuttadi loklox ase at Laulis Linga ga rupot la ga ronga lavapaase atdi. Neni gaklen i do ne Iesu ga vorang avukat lususue atdi la neni bok ga sue ne Iesu xeretna, “Ua levelinga at Laulis Linga i silok ti levelinga axap teren?”

²⁹ La ne Iesu ga vorang i rin keretna, “Levelinga i silok i lok keretna.

* **12:28:** Lu 10:25-28

‘Lubung mixin me Israel, mina rongga i na. Moroa neni Leeme Silok atnimi la legesa Moroa mene nga.
³⁰ Mina vavara aleng Leeme Silok, ne Moroa atnimi mi lebelen nimi axap, mi lороonan axap atnimi, mi levendoxoma axap atnimi, la levelolos axap atnimi.’ *Lal 6:4-5*

³¹ La lara bok sepsev agepura i lok ngan lara gomgo, i lok keretna,
 ‘Mina balamu mo limixin di nemen saparap nimi xerekn-gan pam mi balamu nimi.’ *Mas 19:18*

Kopmen tevelinga ro xeneng at Lovoang Kaala i silok ti na luxot.”

³² La nom laradi ga lok ti ne Iesu, “Leeme loklox ase, lavapaase ram ik mokso. U paase ruturun do legesa Moroa mene nga la kopmen tomoroa bok. ³³ *La i ruturun bok do na levelinga i silok. Mina vavara aleng ne Moroa mi lebelen nimi axap, mi levendoxoma atnimi axap, mi levelolos atnimi axap la mina balamu limixin di nemen saparap nimi ngan mi balamu nemi. Na loklok i silok ti mo loklok tim taba ne Moroa mi leventamtaba la levempanga laplavang.”

³⁴ La ne Iesu ga rongga xisiv i do mo laradi ga paase mi lakleklen la ga lok tin keretna, “I auret kusu una vubeles at Linintoo at ne Moroa.” La melemu at na lubung amgomgo diga xopara i xusu dina sue ne Iesu mi tevesusue.

³⁵ La ne Iesu ga anasa ro at loogu laplavang. Ni ga sue xeretna, “Luvuttadi loklox ase at Laulis Linga dik lox ase limixin do Lanarong neni lurubuno ne Devit. I lok kereva na? ³⁶ Mila ne Devit ga tong asu levelinga mi lodoxoma at Lороonan Kaala la nom levelinga ik lok to xeneng at Lovoang Kaala xeretna,

* **12:33:** Lal 4:35; Ais 45:21; 1 Sml 15:22; Ose 6:6

‘Leeme Silok ne Moroa ga lok ti Leeme Silok tarak keretna,
 una xis de saparap lakngak tino se nenia ana lok li
 limixin munepen minu na ngan loxot burubut ti
 luxangkedek taram.’ *Sam 110:1*

³⁷ Mo do ne Devit ga so asen i do Leeme Silok, i lok kereva
 la Lanarong neni lurubuno at ne Devit?”

La buaang limixin diga lok momo ri ronga levelinga at
 ne Iesu.

Lempanga Xakapmek At Luvuttadi Loklox Ase

At Laulis Linga

(Mt 23:1-36; Lu 20:45-47)

³⁸ La ne Iesu ga anasa bok keretna, “Mina lok tatao
 avukat nemi basinge loklok at luvuttadi loklox ase at
 Laulis Linga, mo di vavara i xusu dinat pas tangtagap mi
 levesingsigaara babaalom atdi la di vavara i xusu limixin
 dina seega rangarang di mi loklok ngangao ro at lengkot
 etang. ³⁹ La di vavara aleng i do dinat kis at lengkot
 kitkis avukat to at laraogu singising la lengkot avukat
 to at lara peluxa. ⁴⁰ La dik lok kaka gamasa lempanga
 at lubungnaa rixin, la di ngising babaalom kusu limixin
 dibak lok ngangao atdi. Losongsongot tidi naba lok
 kapmek aleng tinotno!”

Laramtaba At Labannaa Rixin

(Lu 21:1-4)

⁴¹ *La ne Iesu gat kis to xeneng at loogu laplavang la
 ga reven limixin diga kepe lempilas atdi ro at loxot lili
 pilas. Buaang luvuttadi nopnovos diga kepe laxampilas
 solo. ⁴² Ketla ni ga ven lara labannaa rixin banbalo ga xepe
 legepu xonatat pilas lixilik. Ni lempilas lixilik tinotno.

⁴³ *La ne Iesu ga ro xaka lavaun pinivu ren la ga lok
 tidi xeretna, “A tong tuturun i rinimi do at lemeren ne

* 12:41: 2 Lav 12:9 * 12:43: 2 Ko 8:12

Moroa, na labannaa rixin banbalo i lok li lempilas i silok ti lempilas atnedi axap di xepe lempilas atdi. ⁴⁴ Mila nedi di raba ne Moroa mi loxot lixilik mun at lapnovos silok atdi, ketla neni i raba ne Moroa mi lempilas axap teren.”

13

Iesu Ga Paase Mumu Lempanga Xakapmek

Naba Ravasu

(Mt 24:1-2; Lu 21:5-6)

¹ La melemu ne Iesu ga on basinge loogu laplavang, lara at lavaun pinivu ren ga lok tin keretna, “Leeme loklox ase, pen ba lemparuat silok at loogu laplavang la laraogu avukat bok i tu saparav i.”

² *La ne Iesu ga vorang i xeretna, “Una ven avukat na laraogu nunuan. Taaleng naba vot la kopmen toxonuat at nom laraogu naba nemen at loxot teren. Limixin munepen dinaba vot la dina ut tereve axav i ukopok.”

³ La melemu ni gat kis eburu mi lavaun pinivu ren to at Lakaana Olip. Diga reven loogu laplavang ga tu ro at lakaana vetpes. Pita la ne Jems la ne Jon la ne Endru, nedi xusuk digak lok mi ne Iesu la diga sue ne Iesu xeretna,

⁴ “Una tong i rinama. Lingisa nom lempanga naba vot la loklok katling salai naba lok katling lovotpot ap mo levenaleng do mo lempanga na ravasu?”

⁵ La ne Iesu ga vorang i ridi xeretna, “Mina lok tatao avukat nimi xusu tara noxo xarang arup nimi mumu i na lempanga, ⁶ mila buaang luvuttadi dinaba rupot mi laasen tarak la dinaba lok, ‘Nenia Lanarong!’ La dinaba sar asoogong buaang limixin mi laxalinga xaxarang atdi. ⁷ La minaba ronga i do laraesep mo ik lok la laraesep bok naba vot, ketla laxavaxap at na lavatbung menemen noxo vot

* **13:2:** Lu 19:44

ap mo levenaleng. ⁸*Limixin at lentaba levenabung mixin dinaba esep eburu mi limixin at levenabung mixin petpes. Lavaorong at lentaba levengkitkis orong dinaba esep mi lavaorong at levengkitkis orong petpes. Levenangne naba rupot to at tevengkot axap eburu mi leean kangking. Nom levempanga naba ru katling lavakpaxaru kaxat ap mo levenaleng, naba lok ngan losongsongot i rupot at latkin mo i auret kusu na visik.

⁹*Ketla mina lok tatao avukat nimi. Tentaba dinaba ranga alis nimi la minaba tu at lavapaase ro melamgo at lavaeme silok la dinabak pixis nimi ro at laraogu singising. La minaba tu at lavapaase ro melamgo at lavaeme amgomgo mi lavaorong mila nemi mi nunu rak, ketla minaba tong asu Lagale Lavavang tidi. ¹⁰La limixin boro at levennep axap dinaba ronga be Lagale Lavavang tarak la melemu ren laaleng silok naba rupot. ¹¹*Do dina ranga alis nimi la dina lam kaka nimi uto at lavapaase, nemen mita marat at levelinga salai miba tong asu i ridi. Mina tong asu mene mo levelinga nak lok at levendoxoma atnimi ap mo loxonaleng mila Loroonan Kaala naba raba nimi mi levelinga.

¹²*Lara koeton axa dinaba etaba tuntuna mi luvutneton di ri lanmet. La luvuttemen laxamdak dinaba etaba tuntuna mi laxamdak la laxaalik atdi. La laxamdak mi laxaalik dinabang tonga xepe levelinga at luvuttemen di mi luvutnen di la dinaba lok li di ri lanmet. ¹³*La limixin axap dinaba belangatngas tinimi mila mi mumu asu ia. Ketla lara do i tu atmatkun keneng at levesongsongot ise at laxavaxap ap mo levenaleng, ne Moroa naba lox arooro i.”

* **13:8:** Ais 19:2; 2 Let 15:6 * **13:9:** Mt 10:17-20 * **13:11:** Lu 12:11-12

* **13:12:** Mt 10:21 * **13:13:** Mt 10:22; Jo 15:21

*Laradi Xapmek Naba Tu Ro At Loxot Kaala
(Mt 24:15-28; Lu 21:20-24)*

¹⁴ *La ne Iesu ga lok bok tidi xeretna, “Do mina ven lavanga i lok kapmek aleng na tu ro at loxot i xaala aleng to xeneng at loogu laplavang, nemi minaba nemen to at lenep Judaia, mina sixiro uto at lempatkaana. Mina xasep avukat at na. ¹⁵ *Laradi do ik lok to mavana at loogu ren, ni noxo si kusu na lok ka lempanga ren boro xeneng ap mo loogu ren. ¹⁶ La laradi do nak lok to xataamang, noxomlong bok ba uto at loogu ren kusu na lok ka lavanga singsiga ren. ¹⁷ *Mo laaleng naba lok kapmek aleng ti lavakin teenan eburu mi lavakin mi levengkadede atdi! ¹⁸ Mina ngising ne Moroa do mo laaleng noxo vot saparap nimi edompo mi taaleng kabu. ¹⁹ *Mila levenmumuat ap mo levenaleng naba lok kapmek tinotno. Ga ruka i at lurutu kaxat at na lavatbung menemen mo ne Moroa ga rudum li i, ise nga na lingina. La kopmen bok tara tumumuat kerepmo naba vot melemu. ²⁰ La mo levenaleng ti mo levenmumuat do ne Moroa noxo lox atmur i, kopmen teta naba roo su. Ketla ne Moroa naba lox asusu lebelen tuntun teren ti mo limixin neni gara soxolik ka vam di, la ni naba lox atmur mo levenaleng.

²¹ Ap mo levenaleng nemen gat mita nunu at levelinga at tara na lok tinimi xeretna, ‘Mina ven ba i, neni nga na Lanarong!’ Koplana lok, ‘Neni nga no!’ Nemen mita nunu at nom levelinga atdi. ²² *Mila buaang nedi limixin babala dinaba lok do nedi mo lavanarong at ne Moroa la lavaeme vapaase ali ren. Dinaba lok tempanga sangsangu xusu dina sar asoogong lavaanat soksoxolik at ne Moroa,

* **13:14:** Dan 9:27; 11:31; 12:11 * **13:15:** Lu 17:31 * **13:17:** Lu 23:29
 * **13:19:** Dan 12:1; Jol 2:2; Li 7:14 * **13:22:** Lal 13:1-3; Li 13:13

mo do di epovo. ²³ Kuren la mina doma mumu avukat na levelinga rak. A tong ali avot ta i rinimi.”

Laradi Mevana Naba Vot
(Mt 24:29-31; Lu 21:25-28)

²⁴ *La ne Iesu ga lok bok tidi xeretna, “Ketla ap mo levenaleng melemu at na levenmumuat leveloklok katling naba vot,

‘Losoosoo at laxangking naba xap, la lagaaling noxo soosoo. ²⁵ La larapenti naba subu si boro vana at lamavangkap la lempanga mevana dinaba sixit ekarakat la kopmen di noxo sixit mu larangas atdi.’

Ais 13:10; 34:4

²⁶ La ap mo levenaleng limixin dinaba ven ia, Laradi Mevana, to vana at loxontakabu. Nenia anaba rupot mi langsung lolos la lisisixam silok. ²⁷ *La nenia anaba riki lubang angelo uto at levengkot axap la dinaba lam kaka lavaanat soksoxolik tarak boro at lavanuet laramesuluk at lavanuet laramera manman at na lavatbung menemen.”

Lavapaase Poovo At

Luuna Pik

(Mt 24:32-35; Lu 21:29-33)

²⁸ La ne Iesu ga tong lara lavapaase poovo ridi xeretna, “Mina rongga na laanasa mumu luuna pik. Dola levisisilik at larauna pik di mumulum la levenang i suu xat, nemi miklen i do lamaares i auret ta. ²⁹ La kerepmo do mina ven i na lempanga loklok katling na vot, mina xasep do lovotpot tarak, Laradi Mevana i auret, i ngan laradi i tu at lumusmaragu at loogu la i gagas kusu na beles teren.

³⁰ Nia a tong tuturun i rinimi. Limixin at na loola di rooro lingina di noxo met se na lempanga na ravasu. ³¹ Laxalibet mi lavatbung menemen naba sonao, ketla levelinga rak noxo xap.”

* 13:24: Li 8:12 * 13:27: Mt 13:41

*Kopmen Tara Iklen Laaleng Laradi Mevana Naba Vot
(Mt 24:36-44)*

³² La ne Iesu ga lok bok, “Kopmen tara naklen laaleng at lovotpot tarak. Lubung angelo bok kopmen dinaklen i la nenia, ne Nitna bok kopmen anaklen i. Tamak kusuk mun iklen i. ³³ Kuren la nemi mina reven avukat mila mixoklen i do lingisa mo laaleng naba rupot. ³⁴ *I lok ngan lara leeme silok gat pas uto vaxalom la lavasaxaruki ren diga lok tatao loogu ren. Neni ga tong li leven gugu ridi getgesara la neni ga tong i ri legesara atdi dola neni na lok tatao lumusmaragu la na reven ti lomlong teren.

³⁵ *La nemi mi lok ngan nom lasaxaruki ga lok tatao lumusmaragu. Mina reven avukat amisik mila mixoklen mo laaleng Leeme Silok nabamlong teren. I epovo na rupot ukantinao koplā at laxanimin tubu koplā at nom loxonaleng lengkaxak ing teng kaxat teren, koplā at loxonaleng laxangking it losu ren. ³⁶ Mina reven avukat, naba lok kapmek do mina unga ap mo loxonaleng neni na rupot teren. ³⁷ Nom levelinga ara tong pam i rinimi, la anaba tong box i ri limixin axap, mina reven avukat.”

14

*Loxongkulao Silok Diga Puse Ngas Ti Sev Amet Ne Iesu
(Mt 26:1-5; Lu 22:1-2; Jo 11:45-53)*

¹ *At legepu aleng avot ti mo laaleng leluxa silok at Lovovolo Pe ga auret. La ap mo leluxa diga anan lengkongkide diga ove vetpes i. La lavamaasa silok la luvuttadi loklox ase at Laulis Linga diga puse ngas kusu dina ranga alis nemnem ne Iesu la dina lok li i at lavapaase xusu dina sev amer i. ² Ketla diga epaase xeretna, “Ata

* 13:34: Mt 25:14 * 13:35: Lu 12:38 * 14:1: Mk 11:18

noxo lox i na at laaleng at leluxa. Lavanga limixin dina lok kaxat turube.”

Latkin Ga Lox Agagas Li Ne Iesu Ri Lanmet Teren
(Mt 26:6-13; Lu 7:37-50; Jo 12:1-8)

³ *Iesu gak lok to Beteni at loogu at ne Simon, gano lanmeres gu (leprosy) gak lok teren. La ne Iesu gat kis ti anan, la lara latkin ga vot pasa i, gap kip lubuxom avukat* ga umsu mi laxadan mavak. Mo loxodan laasen teren naat, i nunuan aleng la luunun teren ga urut aleng. La neni ga ba pit kepe laxatli ap mo lubuxom dan mavak la ga soli i ro at lavatlak at ne Iesu.

⁴ La lentaba digak lok go diga ven i, la diga musak aleng la diga epaase xeretna, “Tila i soli xepe gamasa i na? ⁵ Ni i epovo ri sesep mi na laxadan mavak kusu na lok ka lavantun sangaun kobot (300) denarias teren ti lok tooro limixin banbalo.” La diga paase mukmusak ti mo latkin.

⁶ Ketla ne Iesu ga lok tidi, “Keke i. Nemen mita lox angtang na latkin, mila neni i lok lavanga nunuan tia. ⁷ *Limixin banbalo mo dinabat pot pasa amisik nimi xusu minak lok tooro di, ketla nenia noxo nemen eburu amisik minimi. ⁸ *La na latkin i lok lavanga avukat tia. Ni i soli na laxadan mavak at labantuxu rak kusu ti lox agagas li labantuxu rak ti lamaaut. ⁹ A tong tuturun i rinimi. At ua lengkot axap at na lavatbung menemen, limixin dinaba tong asu Lagale Lavavang, la na lavanga neni i lox i, dinaba tong box i xusu limixin dinaklen i.”

Judas Ga Siam Do Neni Na Song Araba Ne Iesu
(Mt 26:14-16; Lu 22:3-6)

* **14:3:** Lu 7:37-38 * **14:3:** Na lubuxom tuntu diga xovox i mi luuat bunbun. * **14:7:** Lal 15:11 * **14:8:** Jo 19:40

¹⁰ La ne Judas Iskariot, lara at lasangaun mi legepura lavaun pinivu at ne Iesu ga vot pasa lavamaasa silok kusu neni na song araba ne Iesu ridi. ¹¹ La nedi diga lok momo aleng la diga tong i ri ne Judas do nedi diba raba i mi lempilas. La ne Judas ga ngangais ti toxonaleng kusu naba epovo rin ti song araba ne Iesu ridi.

Leluxa At Leeme Silok

(Mt 26:17-25; Lu 22:7-14,21-23; Jo 13:21-30)

¹² * At laaleng avot ap mo leluxa limixin me Judaia diga gagas li lengkongkide.* Ap mo laaleng diga sep laxanat sipsip la diga ove i la diga anan i. Lavaun pinivu at ne Iesu diga sue i xeretna, “U vara i do mana lox agagas li laanan tidik ua?”

¹³ La ne Iesu ga lok katling legepura atdi la ga lok tidu xeretna, “Mo do muna beles ukeneng at lemenemen silok, lara laradi nabap kip lubuxom dan naba xip tangarang ka numu. ¹⁴ Muna mumu asu i uto at loogu ni na beles teren. La muna lok ti laradi at loogu xeretna, ‘Leeme loklox ase i sue u do, loxot ua at na loogu ram, neni eburu mi lavaun pinivu ren diba lok katling leluxa at Lovovolo Pe ve?’ ¹⁵ La neni naba lox ase numu mi loxot silok, diga gagas li vam i no i nemen to vana ap mo loogu. Muna gagas li lempanga anan tidik go.”

¹⁶ La nedu duga vas kaxat la dugat pas uto at nom lemenemen, la duga long lenget ka lempanga xerekngan ne Iesu gara tong pam i ridu, la duga lox agagas li leveluxa ri Lovovolo Pe.

¹⁷ Ga ukantinao ne Iesu mi lavaun pinivu ren diga rupot.

¹⁸ * La diga xis la digara anan, la ne Iesu ga lok tidi xeretna,

* **14:12:** Pas 12:6; 14:20 * **14:12:** Leluxa limixin me Judaia diga lok katling laaleng, diga vas kaxat boro Isip. La di goxo lok li liis (yeast) at lengkongkide atdi. * **14:18:** Sam 41:9

“A tong tuturun i rinimi, lara atnimi naba song araba ia ri lavamaasa silok. Mo it kis de la i anan eburu minia.”

¹⁹ La diga lok bukbulu la nedi getgesara diga sue i xeretna, “Kopmen nenia, do?”

²⁰ La neni ga vorang i ridi xeretna, “Neni lara atnemi lasangaun mi legepura. Mo lara i lok kaka lengkompanga anan eburu minia at loxot lili panga anan. ²¹ Nenia, Laradi Mevana, anaba met kerekngan Lovoang Kaala i tong i, ketla naba lok kapmek aleng ti mo laradi naba song araba ia ri lavamaasa silok. Gitaba lox avukat do nenen gitoxo visik ka i.”

²² Move diga anan, la ne Iesu ga lok kaka loxongkide, ga tong avukat ti ne Moroa la ga sebex i la ga raba lavaun pinivu ren min la ga lok, “Mina lok kaka i na. Labantuxu rak na.”

²³ La neni ga lok kaka lakap inin, la ga tong avukat ti ne Moroa, la ga raba di min la nedi axap diga inin teren.

²⁴ *La ni ga lok, “Lada rak na. I lok katling lekabus maxat. Lada rak naba sen su kusu ti limixin buaang, ne Moroa naba doxoma xepe leveloklok kakapmek atnedi. ²⁵ A tong tuturun i rinimi, nenia noxo in at lavaen i ru xaka i lingina se ap mo laaleng nia anaba in lavaen maxat to xeneng at Linintoo at ne Moroa.”

²⁶ La digak pixan mi loxompixan la diga vas kaxat uto at Lakaana Olip.

*Iesu Ga Vaase Ali Do Ne Pita Naba Sok Tixirixes Kepe I
(Mt 26:31-35; Lu 22:31-34; Jo 13:36-38)*

²⁷ *La ne Iesu ga lok tidi xeretna, “Nemi axap minaba subu basinge ia. I lok ngan Lovoang Kaala i lok keretna,

* 14:24: Sak 9:11; Jer 31:31-34; 1 Ko 10:16; Ib 9:20 * 14:27: Mk 14:50

‘Nenia ne Moroa, anaba sep laradi loklok tatao at laxasip-sip, la lubung sipsip dinaba epeseves.’ ” *Sak 13:7*

²⁸ *La ne Iesu ga lok bok tidi, “Ketla melemu at laxakatu kaxat amlong tarak anabamgo rinimi uto Galili.”

²⁹ La ne Pita ga lok tin, “Keke i do nedi axap dina subu basinge u, nenia xopmen tinotno a noxo subu.”

³⁰ La ne Iesu ga lok tin keretna, “Nia a tong tuturun i ru. Lingina at laxanimin laxaxak kovisi noxo reng gepura la nenu unaba sev apkap naba vantun do uxoklen ia.”

³¹ *Ketla ne Pita ga paase lolos tin, “Do di lok do dina sev amer ia, nenia noxo sok tixirixes u.” La lavaun pinivu axap diga tong box i xuren.

Iesu Ga Sing To Getesemane

(Mt 26:36-46; Lu 22:39-46)

³² *La diga rupot to at lara laraamang laasen teren Getesemane, la ne Iesu ga lok ti lavaun pinivu ren keretna, “Mina xis de la ana lok be lising.” ³³ La ni ga lam ka ne Pita, ne Jems la ne Jon, la lainbulu silok ga suxuna lorooro ren.

³⁴ *La ni ga lok tidi, “Lorooro rak i umsu mi lainbulu silok la i auret kusu na lox amer ia. Minak lok de la mina kuxut tangais ia.”

³⁵ La ni ga vas uto vaxalom lixilik la ni ga subu midi mi lemeren uto xopok at laxangka la ga sing ne Moroa do i epovo na lok kepe mo lumumuat naba rupot saparav i ap mo laaleng. ³⁶ *Ni ga lok keretna, “Tamak, u epovo una lok lempanga axap. Kereva, i epovo do una lok pes na lumumuat basinge ia. Ketla nemen gat uta mumu asu lavavara rak, una mu asu mun lavavara ram.”

* **14:28:** Mt 28:16; Mk 16:7 * **14:31:** Jo 11:16 * **14:32:** Jo 18:1

* **14:34:** Jo 12:27 * **14:36:** Ro 8:15; Ga 4:6; Mk 10:38; Jo 6:38

³⁷ La ni gamlong saparap lavaun pinivu ren la ga ven lenget ka di, diga unga la ni ga lok ti ne Pita, “Simon, tila u unga? Kereva, uxu epovo unap kip na lumumuat eburu minia at loxonaleng lixilik mun?” ³⁸ *Mina reven tatao la mina ngising kusu mi noxo subu at loklok tong pen. Loroonan at laradi i epovo na ronga res, ketla labantuxu ixo lolos.”

³⁹ La ne Iesu ga vas xakalik manga la ga sing ngan no avot. ⁴⁰ La ne Iesu gamlong saparap di, la ga ven lenget ka di, diga unga manga, mila lemerendi ga muat. La di goxoklen i do dina tong toxolinga salai rin.

⁴¹ La ne Iesu gat pas, la ga lok lising la gamlong sepsev avantun la ga lok tidi, “Kereva, move mi unga? I epovo vam. Loxonaleng ira rupot pam do dina song araba ia, Laradi Mevana, ti limixin kakapmek. ⁴² Mina xatu. Ata vas tangarang mo laradi na song araba ia, nom boro it pas.”

Larangtanga Alis At Ne Iesu

(Mt 26:47-56; Lu 22:47-53; Jo 18:3-12)

⁴³ La ne Iesu move ga paase la soso mun ne Judas, lara at lavaun pinivu at ne Iesu ga rupot la buaang nedi luvuttadi diga emu min. Digap kip lemparise sepsep la levempukup sepsep. Lavamaasa silok la luvuttadi loklox ase at Laulis Linga, la loxongkulao silok diga riki di.

⁴⁴ Avot ti na, ne Judas ga tong li loklok katling kusu diba ven kibis ne Iesu. Judas ga lok tidi, “Mo lara, nia aba nes i, neni vam ne Iesu. Mina ranga alis i.” ⁴⁵ La soso mun ne Judas ga vot pasa ne Iesu la ga lok tin, “Rabai.” La neni ga nes ne Iesu. ⁴⁶ La diga vas kaxat la diga ranga alis ka ne Iesu. ⁴⁷ La lara at lavaun pinivu ga tu auret la ga rev asu lavarise sepsep teren la ga sep korop kepe labaalung at lasaxaruki at lamaasa gomgo.

* **14:38:** Lu 11:4

⁴⁸ La ne Iesu ga lok tidi xeretna, “Tila nimi mi vot de mi levemparise sepsep la levengkonbom sepsep kusu mina ranga alis ia? Nenia xopmen ana vaxaru kaxat ka leeseep.

⁴⁹ *Buaang levenaleng nia agat kis to xeneng at loogu laplavang kusu ana anasa limixin, ketla nemi mi goxo ranga alis ka be ia go. Ketla mi ranga alis ia xerekngan lavapaase at Lovoang Kaala i tong i.” ⁵⁰ La lavaun pinivu ren diga sixiro axap.

⁵¹ La lara laau maxat ga mumu asu ne Iesu, neni ga siga mene lavanga singsiga nunuan. Diga ranga alis i, ⁵² ketla neni ga sixiro beleben, ga ke lavanga singsiga ren mila diga rebeng alis ka i.

*Loxongkulao Silok Diga Lok Li Ne Iesu At Lavapaase
(Mt 26:57-68; Lu 22:54-55,63-71; Jo 18:13-14,19-24)*

⁵³ La diga lam ka ne Iesu uto at lamaasa gomgo. La lavamaasa silok mi loxongkulao silok mi luvuttadi loklox ase at Laulis Linga diga rupot bok. ⁵⁴ La ne Pita ga mumu asu ne Iesu ro xa vaxalom lixilik la ga vubeles at lemelua saparap loogu at lamaasa gomgo. La neni gat kis mamain eburu mi luvuttadi rutu mu.

⁵⁵ La lavamaasa silok la luvuttadi amgomgo axap diga puse ri tevelinga xaxarang kusu dina xarang taba ne Iesu min la dinaba epovo xusu dina sev amer i, ketla digoxo epovo. ⁵⁶ La buaang limixin diga bala raba i, ketla lavapaase atdi goxo sixit eburu.

⁵⁷ La melemu lentaba diga xatu kaxat la diga bala raba i xeretna, ⁵⁸ * “Maga ronga levelinga ren keretna, ‘Nenia anaba sele utut kepe na loogu laplavang, no luvuttadi diga vaxaru i. La keneng at lavantun aleng nenia anaba vaxaru kaxat bok tara, luvuttadi di noxo gugu i.’ ” ⁵⁹ La levempapaase atdi move goxo sixit emu.

* **14:49:** Lu 19:47; 21:37; Jo 18:20 * **14:58:** Jo 2:19-21

⁶⁰ La lamaasa gomgo ga lok li ne Iesu to kantubu atdi la ga sue i, “Ua lavasuun teren la uxu vaase? U xopara na vorang na levelinga di sok taba u min?” ⁶¹ *Ketla ne Iesu goxo vaase la goxo vorang i rin la lamaasa gomgo ga sue i, “Kereva, nenu Lanarong, Nitna ne Moroa, Leeme Avolo?”

⁶² La ne Iesu ga vorang i rin keretna, “Nenia vam. La nemi minaba ven ia, Laradi Mevana, anabat kis saparap lekngen tino at Lanaraavuk la anaba vot eburu mi lenbantakabu boro vana at laxalibet.”

⁶³ La lamaasa gomgo ga lais korop lavanga singsiga ren, la ga lok, “I paase vupu ri ne Moroa. Keke tevelinga bok ba.

⁶⁴ *Mira rongga vam levelinga ren. Nemi mi doma xereva?”

La diga vorang i do i epovo ne Iesu na met. ⁶⁵ La diga xalaubis lemeren la diga lok pe luxatli ren la diga tir i, la diga lok tin keretna, “Una tong kibis i do nege ip sev u?” La luvuttadi esep diga lam kaka i la diga pasa box i.

Pita Ga Sok Tixirixes Ne Iesu

(Mt 26:69-75; Lu 22:56-62; Jo 18:15-18,25-27)

⁶⁶ La ne Pita gak lok to xamang at lemелua la lara loono maxat ga rupot, neni lasaxaruki at lamaasa gomgo.

⁶⁷ Neni ga ven ne Pita gat kis mamain la ga ven tooro i la ga lok, “Nenu bok ugak lok eburu mi ne Iesu me Nasaret.”

⁶⁸ Ketla ne Pita ga lok, “Nia axoklen lavanga salai u paase min.” La ni gat pas uto at loxot povolo at lemелua.

⁶⁹ La melemu nom loono ga ven manga ne Pita la ga lok ti luvuttadi diga tu go, “Neni nom, lara at lavaun pinivu at ne Iesu.” ⁷⁰ La ne Pita ga sev apkap manga.

La melemu lentaba diga tu saparap ne Pita, diga lok tin keretna, “I ruturun, nenu lara atdi mila nenu bok boro Galili.”

* 14:61: Mk 15:5; Lu 23:9 * 14:64: Jo 19:7

⁷¹ La ne Pita ga vangpe mi levelinga vangpangpe xeretna, “Levelinga rak i ruturun. Do xopmen, ne Moroa na lox asongor ia. Nia axoklen mo laradi.”

⁷²* La soso mun laxaxak ga reng sepsev agepura. La ne Pita ga doma asu at lavapaase at ne Iesu ga lok keretna, “Laxaxak kovisi noxo reng gepura, la nenu unaba sev apkap naba sev avantun do uxoklen ia.” La ne Pita gang teng.

15

Paelat Ga Susue Ne Iesu

(Mt 27:1-2,11-14; Lu 23:1-5; Jo 18:28-38)

¹* Ga maxantamak suubu lavamaasa silok mi loxongku-lao silok la luvuttadi loklox ase at Laulis Linga, nedilavaeme silok axap diga rupot eburu la diga epaase mumu ne Iesu. La diga xoxo alis lukngen la diga lam taba ne Paelat min.

² La ne Paelat ga sue ne Iesu xeretna, “Nenu loorong at limixin me Judaia?”

La ne Iesu ga vorang i rin keretna, “I ruturun. Nenu xa ura tong pam i.”

³ La lavamaasa silok diga sok taba i mi laxalinga buaang.

⁴ La ne Paelat ga sue box i xeretna, “Kereva, u xopara na vorang levelinga atdi? Una ronga ba di, di sok taba u mi laxalinga solo.”

⁵* Ketla ne Iesu xopmen goxo vorang levelinga atdi la ne Paelat ga sangu aleng.

Limixin Diga Lok,

Paxarem I At Laxaba

(Mt 27:15-26; Lu 23:13-25; Jo 18:39-19:16)

* 14:72: Mk 14:30 * 15:1: Lu 22:66 * 15:5: Ais 53:7; Mk 14:61

⁶ At levenmaares axap laradi gomgo boro Rom ga mu asu lara loklok. At leluxa silok at Lovovolo Pe, neni gak soxomus asu lara laradi xokoxo do limixin diga lok katling i. ⁷ La lara laradi, laasen teren ne Barabas gak lok to at loogu xokoxo. Ganoxa neni mi luvuttadi vetpes diga esep eburu mi luvuttadi esep kusu dina lok kepe lagavaman, la neni ga sev amet lentaba. ⁸ La limixin ap mo leluxa diga rupot pasa ne Paelat kusu neni na lox asu tara taradi gak lok to at loogu xokoxo.

⁹ La ne Paelat ga sue di, “Mi vara i do nenia na lox asu loorong atnemi limixin me Judaia?” ¹⁰ Paelat gaklen i do lavamaasa silok diga reven peves at ne Iesu la ni lavasuun teren la diga vara i do dina sev amer i. ¹¹ *Ketla lavamaasa silok diga lox axatu levendoxoma at limixin kusu dina sing ne Paelat do neni na lox asu ne Barabas.

¹² La ne Paelat ga sue di, “La nia ana lok lavanga salai mi na laradi mi so asen i mi loorong at limixin me Judaia?”

¹³ La digap kup silok tin xeretna, “Paxarem i at laxaba.”

¹⁴ La ne Paelat ga sue bok, “Tila? Neni ga lok laxakapmek salai?”

Ketla digap kup silok aleng keretna, “Paxarem i at laxaba.”

¹⁵ Kuren la ne Paelat ga mu asu lavavara atdi la ga lox asu raba di mi ne Barabas. Ketla neni ga raba ne Iesu ti luvuttadi esep kusu dinak paxis i la dina vaxarem i at laxaba.

Luvuttadi Esep Diga Lok Kalise Ne Iesu

(Mt 27:27-31; Lu 23:11; Jo 19:2-3)

¹⁶ La luvuttadi esep diga lam ka ne Iesu uto at loogu nunuan at laradi gomgo la diga ro bubua ka nedi axap luvuttadi esep. ¹⁷ La diga vaxasiga i mi lavanga singsigaara at loorong la diga lok lixiam tin mi laban gagas la diga

* 15:11: Gu 3:13-14

vaxaxua lavatlak teren min. Diga lok mo lempanga xusu ti saba xangka i. ¹⁸ La diga lok keretna, “Ma lok ngangao ram loorong at limixin me Judaia.” ¹⁹ La digak pixis patlak aleng i mi lakdak la diga vubis sanga i. La diga xis tiktikbu mi lempatgulom atdi la diga emi asu sese min. ²⁰ Diga lok kalise axav i la diga lok pes lavanga singsigaara basinge i la diga vaxasiga manga i mi lavanga singsiga xa ren. La diga sat ka i basinge mo loogu silok kusu dina vaxarem i at laxaba.

Diga Vaxarem Ne Iesu

At Laxaba

(Mt 27:32-44; Lu 23:26-43; Jo 19:17-27)

²¹* La lara laradi, laasen teren ne Simon me Sairini, neni temen ne Aleksanda mi ne Rupas, la neni gat pas boro at lemenemen petpes la luvuttadi esep diga sox aruru parang i xusu na xip ka laxaba at ne Iesu. ²² La diga lam ka ne Iesu uto at lenep, loxonasen kot go do Golgata. Lavasuun at na loxolinga do, “Lavatlak Tongan.” ²³ La diga lok do dina raba i mi lavaen diga lok eburu mi lara laxadan mamao di tong i do mur,* ketla ne Iesu goxopara i. ²⁴* La diga vaxarem i ro vana at laxaba la melemu diga lu buru mi lengkonuat kusu ti lok kisip ka nege ba lok ka lempanga singsiga ren.

²⁵ Diga vaxarem ne Iesu ga maxantamak at lavasik konaleng. ²⁶ To mavana at lavatlak teren diga lok li levelinga, mo ga tong asu lavasuun at lumumuat teren. Nom levelinga ga lok keretna, LOORONG AT LIMIXIN ME JUDAIA. ²⁷ La diga vaxarem bok legepu radi xipkip pilo saparap ne Iesu, lara saparap lekngen tino la lara saparap lekngen kia. ²⁸* [Levelinga at ne Aisaia, leeme vapaase

* **15:21:** Ro 16:13 * **15:23:** Lentaba di lok do anai ni lara la marasin kusu ti lok pes losongsongot. * **15:24:** Sam 22:18 * **15:28:** Ais 53:12

ali at ne Moroa ga ravasu ruturun keretna, “Limixin diga doma i do neni bok laradi xapmek.”] ²⁹* La limixin digat pas polo go la diga piriapat lempatlak atdi la diga paase aksaksa ri ne Iesu xeretna, “Nenu ga lok do unaba sele utut kepe loogu laplavang la unaba vaxaru amu box i at lavantun aleng, ³⁰ una eng si ukopok la una lox aroo axa u.”

³¹ La kerepmo bok lavamaasa silok mi luvuttadi loklox ase at Laulis Linga diga paase aksaksa. Diga lok keretna, “Neni ga lox aroo lentaba vetpes, ketla neni ixo epovo do na lox aroo axa i. ³² Mo do neni Lanarong at ne Moroa la loorong at limixin me Israel, neni na eng si ukopok la nedik ataba nunu ba ren.” Luradi duga merem saparav i, nedu bok duga paase rin mi laxalinga xapmek.

Lanmet At Ne Iesu

(Mt 27:45-56; Lu 23:44-49; Jo 19:28-30)

³³* At lasangaun mi legepu xonaleng, laxangking ga xis tubu la lamain ga vung pavaa mo lenep silok axap la gak lok se at lavantun konaleng. ³⁴* La at lavantun konaleng ne Iesu ga xup silok keretna, “Eloi, Eloi, lama sabaktani!” Lavasuun at na levelinga xeretna, “Moroa rak, Moroa rak, tila u raba rulu ia?”

³⁵ Lentaba luvuttadi diga tu go, diga rongga i la diga lok, “Ata rongga i, neni i toro ri ne Elaisa.”

³⁶* La lara laradi ga sixit, la ga lok ka loxontamon la ga lox amlu xaka i ro xeneng at lavaen mamao la ga xoxo li i ro at loxonuna la ga lok do na vaxain ne Iesu min, la ga lok keretna, “Ata ven be i do ne Elaisa go naba rupot ti lok tooro i.”

³⁷ La ne Iesu ga xup silok la ga met.

* **15:29:** Sam 22:7; 109:25; Mk 14:58 * **15:33:** Amo 8:9 * **15:34:** Sam 22:1
 * **15:36:** Sam 69:21

³⁸ La ap mo loxonaleng lavattamon silok ga merem to xeneng at loogu laplavang ga rem lais ka ro vana, ga su ro xopok la ga ra ngan ta legepu ban. ³⁹ La laasesep ga tu go xopok to melamgo at ne Iesu ga ronga luxupkup teren la ga ven lanmet teren. Kuren la neni ga lok, “Neni lamdak tuturun pam at ne Moroa.”

⁴⁰ *Lentaba lavakin mo diga tu ro vaxalom diga reven lanmet at ne Iesu. Levenasen atdi, Maria Magdalene, Maria nenen ne Jems kakalik mi ne Joses la ne Salomi. ⁴¹ Ganoxa nedi diga mumu asu ne Iesu ap mo levenaleng neni ga nemen to Galili la diga lok tooro i. Lavakin petpes bok mo diga mumu asu ne Iesu uto Jerusalem.

Digak Mit Ne Iesu

(Mt 27:57-61; Lu 23:50-56; Jo 19:38-42)

⁴² Mo laaleng Iesu ga met teren, ni laaleng gagas, la laaleng avot ti laaleng kaala. ⁴³ Ga ukantinao Josep me Arimatia neni lara at lavaeme silok at limixin me Judaia la neni ga ngangais ti Linintoo at ne Moroa. Neni goxo marat la ga vot pasa ne Paelat la ga sing i do neni na raba i mi labantuxu at ne Iesu. ⁴⁴ La ne Paelat ga sangu do ne Iesu gara met pam. La neni ga ro ka laasesep teren la ga sue i dola ne Iesu ira met pam koplakopmen. ⁴⁵ La mo laasesep ga tong i rin do mo levelinga i ruturun. La ne Paelat ga siam ta do ne Josep na lok ka labantuxu at ne Iesu. ⁴⁶ La ne Josep ga lok ka labantamon maxat la ga lox asi labantuxu at ne Iesu ukopok, la ga bom i mi nom labantamon. La diga lok li i ro xeneng at lamaaut, no diga xe i ro xeneng at lavaruat silok. La ne Josep ga xavun pe lumusmaragu at lamaaut mi lavaruat. ⁴⁷ La ne Maria Magdalene mi ne Maria nenen ne Joses duga ven katling mo loxot, lamaaut at ne Iesu gak lok teren.

* **15:40:** Lu 8:2-3

16

Lorooro Xat Amlong

At Ne Iesu

(Mt 28:1-8; Lu 24:1-12; Jo 20:1-10)

¹ Se laaleng kaala ga xap, Maria Magdalene, Maria nenen ne Jems la ne Salomi diga un kaka laxadan somavak kusu dina lok li i at labantuxu at ne Iesu. ² Ga maxantamak suubu at laaleng avot ap mo luik, laxangking ga losu la nedi lavakin digat pas uto at lamaaut at ne Iesu. ³ Diga esue xeretna, “Nege naba xavun kepe lavaruat mo ik lok pe lungusungu ap mo lamaaut?”

⁴ Se diga rupot go, diga milik upana la diga ven i do lara ga xavun kepe vam mo lavaruat silok basinge lamaaut. ⁵ Diga vubeles at lamaaut, la diga ven lara laradi maxat, levesingsigaara ren ganbun aleng la neni gat kis at lenep tino la diga lingun teren.

⁶ La neni ga lok tidi xeretna, “Nemen gat mita marat. Mi puse ri ne Iesu me Nasaret no ga rem at laxaba. Ketla neni ira roo xat pam. Mina ven loxot diga vaxamdi i ren, neni xopmen nak lok bok ba de. ⁷ *Mina onon la mina vot pasa ne Pita mi lavaun pinivu at ne Iesu la mina tong i ridi do ne Iesu iramgo vam tidi uto Galili. La dina mumu asu i la dinaba ven i ngan neni ga tong pam i ridi.”

⁸ La nom lavakin diga dede la diga rangku mi lanmarat la diga sixisu boro xeneng at lamaaut la diga sixiro. La di goxo tong na lavanga ti tara mila diga marat.

Maria Magdalene Ga Ven

Ne Iesu

(Mt 28:9-10; Lu 24:10-11; Jo 20:11-18)

⁹ * [La ne Iesu ga roo xat amlong at laaleng avot ap mo luik. La ne Maria Magdalene ga ven avor i, ganoxa ne Iesu

* **16:7:** Mt 26:32; Mk 14:28 * **16:9:** Lu 8:2

ga riki xepe lavanuti lubunggas basinge i. ¹⁰*La ne Maria gamlong la ga vot pasa nedi diga mumu asu ne Iesu. Diga duudu la digang teng mumu ne Iesu la ne Maria ga tong i ridi do neni ga ven pam ne Iesu. ¹¹At loxonaleng diga rongga i nom, di goxo nunu do ne Iesu mo ga roo xat pam la ne Maria ga ven i.

*Lavaun Pinivu At Ne Iesu Diga Ven I
(Lu 24:13-35)*

¹²La melemu legepura at lavaun pinivu at ne Iesu dugat pas uto at lara lemenemen la duga ven ne Iesu ga ruuna levereven petpes. ¹³La melemu dugamlong la duga tong i ri lavaun pinivu ren, ketla di goxo nunu atdu.

¹⁴*La melemu ne Iesu ga vot pasa lasangaun mi legesara lavaun pinivu ren at loxonaleng diga anan. La neni ga vaase sok di mila lununu atdi goxo lolos la di goxo nunu atnedi diga ven pam i.

¹⁵*La neni ga lok tidi xeretna, “Mina onon uto at levengkot axap at na lavatbung menemen la mina tong asu Lagale Lavavang tarak ti limixin axap. ¹⁶*Dola tara na nunu at Lagale Lavavang tarak la na lok ka lesep susu, neni naba roo su. Dola tara noxo nunu at Lagale Lavavang tarak, neni naba seeve. ¹⁷*Nedi di nunu at Lagale Lavavang tarak, Moroa naba raba di mi leveloklok katling keretna. At laasen tarak dinaba riki xepe lubunggas basinge limixin. La dinaba paase mi levempapaase vetpes. ¹⁸*La dinaba rebeng kaka levesii xapmek la limixin dinaba sep sak di, ketla di noxo meres la di noxo met, la dinaba lok li levengkikngen di at limixin mekmeres la nom limixin dinaba lox avukat.”

* **16:10:** Mt 28:10 * **16:14:** 1 Ko 15:5 * **16:15:** Gu 1:8 * **16:16:**
Gu 2:38 * **16:17:** Gu 2:4; 8:7; 10:46 * **16:18:** Lu 10:19; Gu 28:3-6

Moroa Ga Lam Ka Ne Iesu
(Lu 24:50-53; Gu 1:9-11)

¹⁹*Se Leeme Silok ne Iesu ga vaase axap, Moroa ga lam ka i uto vana at laxalibet la neni ga xis saparap lekngen tino at ne Moroa. ²⁰*La lavaun pinivu ren diga vas kaxat la diga tong asu Lagale Lavavang to at levengkot axap la Leeme Silok ga gugu eburu midi la ga lox aruturun lavapaase atdi mi lempanga sangsangu.]

* **16:19:** Gu 2:33-34 * **16:20:** Gu 14:3; Ib 2:3-4

Lenavolo Lovoang Kaala Maxat La Sam
The New Testament and Psalms in the Madak Language of Papua
New Guinea

Nupela Testamen na Buk Song long tokples Madak long Niugini

copyright © 1995, 2011 Wycliffe Bible Translators, Inc.

Language: Madak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-24

PDF generated using Haiola and XeLaTeX on 19 Oct 2021 from source files dated 1 Dec 2020

746cf984-10cb-5215-870d-023c1da5c00d